

Ri xuq'alajisaj ri Dios che ri Juan

Ri Juan kutz'ib'aj taq ri xuk'ut ri ángel chwach


1 ¹E q'alajisanik wa' xuya ri Dios che ri Qanimajawal Jesucristo cha' Rire kuk'ut chike ri raj chakib' sa' taq ri katajin loq. Ruq'alajisaxik xu'an ri Jesús e xutaq lo ru ángel cha' kolub'il'ij wa' che ri raj chak Juan. ²Ek'u ri Juan xuq'alajisaj kan ri tzij re ri Dios, ri q'alajisanik re ri Qanimajawal Jesucristo ruk' taq ri xk'ut chwach rire. ³Nim uq'ij ralaxik ri kajilan wa ch'a'tem re wa q'alajisanik yey nim kiq'ij kalaxik konoje ri ketaw re wa' yey kakitaqej ronoje taq ri tz'ib'ital chupa, ma xa naqaj chi k'o wi lo ruq'ijol echiri' ku'ana taq wa!.

Ri Juan kuya pan rutzil kiwach ri wuqub' iglesias

⁴Ri'in in Juan kintz'ib'an pan chike ri wuqub' iglesias e k'o chupa taq ri tinamit re Asia.

K'ulu alaq ri unimal rutzil k'u'xaj y ri utzil chomal, ri kape ruk' ri Jun k'o waq'ij ora, ri xex chi k'o lo wi y ri k'o chiqawach apanoq, ri kape ruk' ri wuqub' uwach Uxlab'ixel k'o chwach rutz'ulib'al pa kataqan wi, ⁵yey ri kape ruk' ri Qanimajawal Jesucristo, ri kuq'alajisaj chi utz ri Q'ijsaq. Rire e ri nab'e xk'astaj lo chikixo'l ri ekaminaq y e ri k'o pakiwi konoje ri e taqanelab' che ruwachulew. Rire lik k'ax xojuna'o y xojuch'aj che taq ri qamak ruk' rukik'el xturuw chwa ri cruz. ⁶Xu'an k'u xa jun tinamit chiqe y xu'an chiqe oj taqanel y oj chakunel chwach ri Dios, Ruqaw Rire. Ek'u Rire lik taqal che kayak uq'ij waq'ij ora y chiqawach apanoq ma lik sa'chi ruchomal y ruchuq'ab!. ⁷Tape alaq, ri Qanimajawal Jesucristo pa sutz' kak'un wi. Konoje k'u ri' kakilo, kakil ne ri xekamisan re. Y konoje ruk'iyal kiwach taq ri tikawex che ruwachulew lik keb'oq'ik rumá ruk'unib'al.^a Paqatzij wi jela' ku'ano.

^a 1:7 Mt. 24:30



*Taq ri tinamit pa e k'o wi ri wuqub' iglesias re Asia
(Apocalipsis 1:4—3:22)*

⁸ «Ri'in in ri jeqeb'al re yey in ri k'isb'al re, jela' pacha' ri ka'ib' letra A y Z»^b kacha ri Qanimajawal, ri Jun k'o waq'ij ora, ri xex chi k'o lo wi y ri k'o chiqawach apanoq yey ri k'o ronoje unimal chuq'ab' puq'ab'!

Ri xk'ut che ri Juan pa ri isla Patmos

⁹ Ri'in in Juan in b'are jun uk' alaq hermanos, junam oj k'o chupa rutaqanik ri Qanimajawal Jesucristo y junam kaqach'ij uchuq'ab' taq ri k'axk'ob'ik ruk' unimal qak'u'x. E ri'in xine'yo'q pa ri isla Patmos ruma xintzijoj ri Tzij re ri

^b 1:8 "A y Z": Kil "Alfa y Omega" pa vocabulario.

Dios y ri Q'ijsaq re ri Qanimajawal Jesucristo. ¹⁰ Pa k'u jun q'ij domingo^c in k'o puq'ab' ri Ruxlab'ixel ri Dios echiri' xinto xch'aw lo Jun chwiji, wa' lik ko kach'awik pacha' uch'awib'al trompeta. ¹¹ Jewa' xub'iij:

«Ri'in in ri jeqeb'al re yey in ri k'isb'al re, jela' pacha' ri ka'ib' letra A y Z. Chatz'ib'aj k'u chupa juna libro ronoje taq ri kawilo y chataqa b'i chike ri wuqub' iglesias e k'o chupa taq ri tinamit re Asia: ri k'o Éfeso, ri k'o Esmirna, ri k'o Pérgamo, ri k'o Tiatira, ri k'o Sardis, ri k'o Filadelfia y ri k'o Laodicea» xcha!.

¹² Xintzu'n k'u pan chwiji cha' kanwilo china ri kach'a't lo wuk'; y echiri' xintzu'n apanoq, xinwil pan wuqub' utzuk'ulib'al aq' re oro. ¹³ Chikinik'ajal k'u ri wuqub' utzuk'ulib'al aq' re oro, xinwil pan Jun lik e katzu'n Ralaxel Chikixo'l Tikawex. Ukojom jun uq'u' kopon k'a chuql raqan y kojotal jun pas re oro chwa uk'u'x. ¹⁴ Rujolom y ruwi' lik saq jela' pacha' ri mit saq y pacha' ri nieve;^d y ukab'ichal ruwach pacha' aq' kareprotik. ¹⁵ Ri raqan kawolq'linik pacha' ri ch'ich' bronce echiri' kesax lo pa ri orna; ruqlu katatajik jela' pacha' utza'm ya' e ri' xk'unik. ¹⁶ Puwikiq'ab' e k'o wuqub' ch'umil; puchi' kel lo jun espada lik t'isi's utza'm y ka'ib' ruwi re!.^e Rupalaj jela' pacha' ri q'ij echiri' lik kareprotik. ¹⁷ Ek'uchiri' xintzu' uwach, xintzaq xe'raqan uq'ab' y xinkanaj kanoq pacha' in kaminaq chik. Ek'u Rire xuya ruwikiq'ab' panuwi' y jewa' xub'iij chwe:

«Maxi'l'ij awib', ma Ri'in in ri nab'e yey in ri k'isb'al re. ¹⁸ In ri xex in k'o wi, In ri xinkamik, pero wo'ora na jinta chi utaqexik ri nuk'aslema. Panuq'ab' Ri'in k'o wi ri kamik y panuq'ab' k'o wi keb'enuk'astajisaj lo ri ekaminaq.^f

¹⁹ »Chatz'ib'aj janipa ri xk'ut chawach, ruk' taq ri kat-tajin che rilik y ri katajin lo chiqawach apanoq. ²⁰ Ri ke'elawi ri wuqub' ch'umil awilom pa nuwikiq'ab' y taq ri wuqub' utzuk'ulib'al aq' re oro e wa': Ri wuqub' ch'umil e ri wuqub' ángeles e chajinel ke ri wuqub' iglesias; yey ri wuqub' utzuk'ulib'al aq' re oro e ri wuqub' iglesias.

^c 1:10 Pa ri ch'a'tem griego kub'iij "ri q'ij re ri Qanimajawal Jesucristo".

^d 1:14 Ri nieve jela' rusaqil pacha' katzu'n ri saqb'ach. ^e 1:16 Wa espada e ke'elawi Ruch'a'tem ri Cristo yey wa' lik k'o uchuq'ab' ma ronoje ri kub'iij e ku'aná'. Heb. 4:12 ^f 1:18 Pa ri ch'a'tem griego kub'iij "Panuq'ab' k'o wi ri lawe re ri kamik y re ri luwar pa kek'oji' wi ri ekaminaq."

Ri xtz'ib'ax pan che riglesia k'o Éfeso

2 ¹»Chatz'ib'aj pan wa' che ri aj k'amal wach^g re riglesia k'o Éfeso:

E ri Jun k'o wuqub' ch'umil puwikuq'ab', ri kab'in chikinik'ajal ri wuqub' utzuk'ulib'al aq' re oro, jewa' kub'i'ij chiwe:

² Ri'in lik weta'am ronoje ri ki'ano, ri k'ayewlaj chak i'anom y runimal ik'u'x chwach taq ri k'ax. Weta'am na keb'il'ul ta iwuk' ri winaq itzel kik'u'x. Ma lik ik'amom kipa ri kakib'i'ij e taqo'n re ri Cristo* tob' na e taj; yey xq'alajin k'u ri' xa e aj raq'ub'al. ³Lik itijom k'u ri k'ax y na kixkos ta k'ana che ri nuchak. Iya'om ik'u'x che utzijoxik ri nub'i' y na paxinaq ta ik'u'x che. ⁴Pero Ri'in k'o taq ri na kuk'ul ta nuk'u'x che ri ki'ano: E ri rutzil ik'u'x wuk' na e ta chi pacha' ri xijeqeblej loq. ⁵E uwari'che k'una chik'u'x pachawi ix jaljob'inaq wi. Chitzelej k'u itzij chwach ri Dios y chi'ana tanchi ri chak jela' pacha' ri xi'an lo che ri jeqeb'al loq. Ma we na kitzelej ta itzij, Ri'in kink'un lo iwuk' y kanwesaj k'u puluwar ri tzuk'ulib'al aq' re oro iwe'ix. ⁶No'j k'u ri utz k'a kixtajin che u'anik, e ri tzel kiwil taq ri na utz taj kaki'an ri nicolaítas,^h ma jenela' Ri'in lik tzel kanwil taq ri kaki'ano. ⁷China k'u ri k'o utanib'al, e chuta ri kub'i'ij ri Ruxlab'ixel ri Dios chike taq riglesias. China k'u ri kach'ijow uchuq'ab' taq ri na utz taj, kanya che kutij re rujiq'ob'alil ri che' re k'aslemal, ri k'o chunik'ajal ri werta re ri Dios, kacha'.

Ri xtz'ib'ax pan che riglesia k'o Esmirna

⁸»Chatz'ib'aj pan wa' che ri aj k'amal wach re riglesia k'o Esmirna:

E ri Jun kab'i'n re: "Ri'in in ri nab'e yey in ri k'isb'al re, ri xkamik y xk'astaj tanchik", jewa' kub'i'ij chiwe:

^g 2:1 "Aj k'amal wach": Pa ri ch'a'lem griego kub'i'ij "ángel". Pa capítulo 2 y 3, wa' ke'elawi jun ángel re ri Dios o jun tikawex kuq'alajisaj Ruch'a'lem ri Dios chike jujun chik. ^h 2:6 "Nicolaítas": Wa' e taq utijo'n jun achi Nicolás rub'i!. Ruk'utunik rire xa sokoso'nik.

⁹Ri'in lik weta'am ronoje ri ki'ano, ri k'axk'ob'ik ix k'o wi y ri nib'a'il kiwik'owib'ej, tob' paqatzij wi ri'ix lik k'o ib'eyomal chwach ri Dios. Lik weta'am ronoje ri tzel itzijob'exik kaki'an jujun e aj judi'ab', ri kakib'i'ij e utinamit ri Dios tob' na e ta kuk'il, ma e kuk'il ri e k'o puq'ab' ri Satanás*. ¹⁰Mixi'ij k'u iwib' che ronoje taq ri kiwik'owib'ej. Chitape': Kak'am ipa, ma ritzel winaq keb'uya jujun chiwe pa cárcel y kixk'oji' pa k'axk'ob'ik lajuj q'ij. Chitikib'a! k'u ri kub'ulib'al ik'u'x, tob' kixkamisaxik; ma Ri'in kanya jun corona chiwe, wa' e ri k'aslemal na jinta utaqexik. ¹¹China k'u ri k'o utanib'al, e chuta ri kub'i'ij ri Ruxlab'ixel ri Dios chike taq riglesias. China k'u ri kach'ijow uchuq'ab' taq ri na utz taj, ri' na kik'ow ta chupa ruka'm kamik, kacha!.ⁱ

Ri xtz'ib'ax pan che riglesia k'o Pérgamo

¹²»Chatz'ib'aj pan wa' che ri aj k'amal wach re riglesia k'o Pérgamo:

E ri Jun ruk'a'am ri espada lik t'isi's utza'm yey ka'ib' ruwi re', jewa' kub'i'ij chiwe:

¹³Ri'in lik weta'am ronoje ri ki'ano; yey weta'am e pa ri tinamit pa ix k'o wi, kataqan ri Satanás. Na ruk' ta k'u ri', k'a ikojom ri nub'i' y na iwaresam ta iwib' chwij ma lik kub'ul ik'u'x wuk', tob' ne echiri' chupa la' ta tinamit xkamisax ri Antipas, ri lik jusuk' tzijonel we. ¹⁴Pero Ri'in k'o taq ri na kuk'ul ta nuk'u'x che ri ki'ano: E ri eb'ik'ulum chiri' ri kitaqem ruk'utunik ri jun aj q'ij re ojertan Balaam rub'i!. Ma ri Balaam xuk'ut che ri Balac su'anik kukoj tzaqib'al pa kib'e raj Israel cha' kakitij ri ik'owisam chi chikiwach ri tiox y kaketz'ab'ej uwa kiq'ij kuk' jujun chik na kik'ulel taj.^j ¹⁵Yey ri'ix eb'ik'ulum chiri' ri kitaqem ri kik'utunik ri nicolaítas, wa' wa k'utunik lik tzel kanwil Ri'in. ¹⁶E uwari'che chitzelej itzij chwach ri Dios; ma we na ki'an taj, Ri'in kinopon tan iwuk' y kinch'ojin k'u ri' kuk' ri nicolaítas ruk' ri nu espada kel lo pa nuchi!.^k ¹⁷China k'u ri k'o utanib'al, e

ⁱ 2:11 Ap. 20:6,14; 21:8 ^j 2:14 Nm. 25:1-3; 31:16 ^k 2:16 Wa espada ke'elawi e Ruch'a'tem ri Cristo yey wa' lik k'o uchuq'ab' ma ronoje ri kub'i'ij e ku'ana!. Heb. 4:12

chuta ri kub'l'ij ri Ruxlab'ixel ri Dios chike taq riglesias. China k'u ri kach'ijow uchuq'ab' taq ri na utz taj, Ri'in kanya che kutij re ri wa'im ewatalik, wa' e ri maná^l y kanya k'u jun ralko ab'aj lik saq che y chwach ri ralko ab'aj tz'ib'ital jun k'ak' b'i'aj na jinta junq eta'mayom re, xew keta'man ri kak'uluw re, kacha!

Ri xtz'ib'ax pan che riglesia k'o Tiatira

¹⁸ »Chatz'ib'aj pan wa' che ri aj k'amal wach re riglesia k'o Tiatira:

Ruk'ajol ri Dios, ri Jun k'o taq uwach pacha' aq'
kareprotik y ri raqan lik kawolq'inik pacha' ri ch'ich'
bronce echiri' kesax lo pa ri orna, jewa' kub'l'ij
chiwe:

¹⁹ Ri'in lik weta'am ronoje ri ki'ano. Weta'am ri rutzil ik'u'x, ri kub'ulib'al ik'u'x, ri nimanik ki'ano y runimal ik'u'x. Yey lik weta'am e taq ri chak kixtajin che u'anik waq'ij ora, más k'i chwach taq ri i'anom lo nab'e. ²⁰ Pero Ri'in k'o taq ri na kuk'ul ta nuk'u'x che ri ki'ano: E ri ik'ulum chixo'lib'al ri'ix ri jun ixoq Jezabel rub'i!.^m Wa' wi'xoq u'anom q'alajisanel che rib'; pero ruk' taq ruk'utunik, e keb'usok ri waj chakib' cha' kaketz'ab'ej uwa kiq'ij kuk' jujun chik na kik'ulel taj y kikitij ri ik'owisam chi chikiwach ri tiox. ²¹ Ek'u Ri'in lik naj woye'em cha' kutzelej utzij chinuwach, pero na karaj taj karoq'otaj kan ri na utz taj, wa' e ri makunik kuk' rachijab'. ²² Chitape': Ri'in kanya wi'xoq pa yab'il cha' katzaq chwa uwarab'al, y jek'ula' keb'enuya pa unimal k'axk'ob'ik konoje ri kemakun ruk' we e la' na kakitzelej ta kitzij che taq ri na utz taj ki'anom ruk'. ²³ Keb'enukamisaj na konoje ri ralk'o'al wi'xoq, cha' jela' konoje riglesia kaketa'maj e Ri'in kanwilo sa' ri k'o chupa ri kina'oj ri winaq y ri k'o chupa ri kanima', we utz o na utz taj. E Ri'in kanya chijujunal ri'ix ri taqal chiwe e chirij taq ri

^l 2:17 Éx. 16:31-33 ^m 2:20 Pa wa iglesia xk'oji' jun ixoq aj wach yej rire xeb'umin jujun chupa ri na utz taj pacha' xu'an ri reina Jezabel re ejertan. 1R. 16:31; 2R. 9:22,30

i'anom. ²⁴No'j kamb'i'ij k'u chiwe ri'ix ri nik'aj chik re riglesia k'o Tiatira, ri na itaqem ta wa k'utunikⁿ yey na iya'om tane iwib' che u'anik ri kakib'i'ij rike "e xew ke ri lik k'o kimajom puwi ri ewatalik chikiwach ri jujun chik" yey wa' ruk' ri Satanás petinaq wi, kamb'i'ij k'u chiwe: Na jinta jun chik eqa'n kanya chiqul. ²⁵Xew e lik miwesaj iwib' che ronoje ri uya'om ri Dios chiwe k'a echiri' kinopon tanchi iwuk!. ²⁶Ma e chike ri kech'ijow uchuq'ab' ronoje taq ri na utz taj y kaki'an wo'ora sa' ri kuaj Ri'in y jela' ketajin che u'anik k'a echiri' kinopon tanchi iwuk', ri' kanya pakiq'ab' ketaqan pakiwi taq ri tinamit che ruwachulew, ²⁷jela' pacha' ri uya'om ri Nuqaw chwe Ri'in. Y jek'ula' ketaqan pakiwi taq ri tinamit ruk' jun vara ch'ich' pakiq'ab' y kaki'an k'u chike pacha' echiri' ka'an uk'aj che juna xun re ulew. ²⁸Jek'ula' chike ri ketaqanik, kan'an chike kewonik pacha' ruchomal ri nimalaj ch'umil re ri saqríb'al. ²⁹China k'u ri k'o utanib'al, e chuta ri kub'i'ij ri Ruxlab'ixel ri Dios chike taq riglesias, kacha!.

Ri xtz'ib'ax pan che riglesia k'o Sardis

3 ¹»Chatz'ib'aj pan wa' che ri aj k'amal wach re riglesia k'o Sardis:

Ri Jun k'o ri wuqub' uwach Uxlab'ixel re ri Dios ruk' y k'o ri wuqub' ch'umil ruk', jewa' kub'i'ij chiwe:

Ri'in lik weta'am ronoje ri ki'an. Kab'i'x ne chiwe "ix k'aslik", pero na qatzij taj ma ri'ix ix kaminaq chwach ri Dios. ²Kamb'i'ij k'u chiwe: Chixk'astajoq y lik chitija chi uq'ij kiyak iwib' che taq ri utz k'a kixtajin che u'anik, ma taq wa' katajin usachik uwach. Ek'u Ri'in wilom ri i'anom, yey wa' na e ta ri karaj ri Dios chiwe. ³K'una k'u chik'u'x sa' taq ri imajom y sa' taq ri itom chwi ri k'utunik ik'ulum. E chitaqej taq wa' y chitzelej itzij chwach ri Dios; ma we kixwarik, Ri'in xaqik'ate't kinopon iwuk' jela' pacha' ri roponib'al releq'om, ma na iweta'am ta k'u ri' ri ora echiri' kinoponik. ⁴Pero e k'o jujun tikawex

ⁿ 2:24 Ap. 2:20

iwuk' chirí' Sardis lik jusuk' ri kib'inik kisilab'ik chwach ri Dios, wa' na kich'ulam ta kib' ruk' ri mak. Yey chiqawach apanoq rike junam keb'in wuk' ruk' kiq'u' saq, ma e taqal ri' chike. ⁵China k'u ri kach'ijow uchuq'ab' taq ri na utz taj, kawiq ruk' uq'u' saq y na kanyoj ta rub'i' chupa ri libro re k'aslemañ na jinta utaqexik. Yey kanq'alajisaj k'u rub'i' chwach ri Nuqaw y chikiwach ri ángeles e k'o ruk!. ⁶China k'u ri k'o utanib'al, e chuta ri kub'i'ij ri Ruxlab'ixel ri Dios chike taq riglesias, kacha!.

Ri xtz'ib'ax pan che riglesia k'o Filadelfia

⁷»Chatz'ib'aj pan wa' che ri aj k'amal wach re riglesia k'o Filadelfia:

E kub'i'ij wa' ri Jun lik nim uq'ij Santo, ri xew kub'i'ij ri lik usuk!. Puq'ab' Rire k'o wi ri lawe re ri rey David. Ek'u Rire, we k'o xujaqo, na jinta chi junoq kariqow utz'apixik; yey we k'o xutz'apij, na jinta chi junoq kariqow ujaqik. Jek'uwa' kub'i'ij Rire chiwe:

⁸Ri'in lik weta'am ronoje ri k'lano. Chitape!: Ri'in nuya'om chiwach ri'ix jun puerta jaqalik y wa' wa puerta na jinta junoq kariqow utz'apixik; ma tob' na lik ta k'o ichuq'ab', e lik itaqem ri Nutzij y na kixk'ix tane che ri nub'i' chikiwach ri winaq. ⁹Chitape!: Ri e k'o puq'ab' ri Satanás* (wa' kakib'i'ij "oj utinamit ri Dios ma oj aj judi'ab!" kecha!, pero kaki'an raq'ub'al ma na e ta kuk'il rutinamit ri Dios), Ri'in kan'an k'u chike rike e ko'lkixuku kib' chiwach ri'ix y kaketa'maj k'u ri' Ri'in lik k'ax kixinna'o. ¹⁰Ri'ix ich'ijom uchuq'ab' taq ri k'axk'ob'ik ruk' unimal ik'u'x pacha' ri ximb'i'ij chiwe; ruma k'u ri', kixinchajij che taq ri k'axk'ob'ik katajin lo puwi ronoje ruwachulew, wa' e re k'amb'al kipa konoje ri tikawex. ¹¹Chitape!: Ri'in kinopon tan iwuk'; lik k'u miwesaj iwib' che ronoje ri uya'om ri Dios chiwe, cha' jela' na jinta junoq kamajaw ri corona^o kuya ri Dios chiwe. ¹²China k'u ri kach'ijow uchuq'ab' taq ri na utz taj, Ri'in kan'an

^o 3:11 "Corona": Wa' ke'elawi e ri rajil uk'axel kuya ri Dios chila' chikaj chike ri xki'an ri utz.

che ku'an pacha' bastión re ukowil ri Rocho ri nu Dios y na kel ta chi k'ana chirí!. Kantz'ib'aj k'u che rire rub'i' ri nu Dios y rub'i' rutinamit ri nu Dios, wa' e ri k'ak' Jerusalem kape chila' chikaj ruk' ri nu Dios. Yey kantz'ib'aj ne ri k'ak' nub'i' che. ¹³China k'u ri k'o utanib'al, e chuta ri kub'i'ij ri Ruxlab'ixel ri Dios chike taq riglesias, kacha!.

Ri xtz'ib'ax pan che riglesia k'o Laodicea

¹⁴»Chatz'ib'aj pan wa' che ri aj k'amal wach re riglesia k'o Laodicea:

Ri Jun Lik Are', ri paqatzij wi kuq'alajisaj chi utz ri Q'ijsaq, ri xjeqow lo ronoje ri xu'an ri Dios, jewa' kub'i'ij chiwe:

¹⁵Ri'in lik weta'am ronoje ri ki'ano. Ri'ix na ix tane joron y na ix tane k'atan. iLik utz we ta ix joron o we ta ix k'atan! ¹⁶Pero rumá k'u xa ix saqmíq'in ma na ix tane joron y na ix tane k'atan, kixinhab'ej na lo pa nuchi!. ¹⁷Ma ri'ix kib'i'ij: "Lik oj b'eyom, ronoje ri kajawax chiqe k'o chi quk' y na jinta nib'a'il kaqatijo"; no'j lik toq'o' ne iwach ma na kina'b'ej ta k'u ri' chwach ri Dios na jinta k'ana iwach, lik ix nib'a!, ix potz' yey ix ch'analik. ¹⁸E uwari'che kanya wa pixab'anik chiwe: Chiloq'o chwe Ri'in ri oro lik chom, porotal chi utz pa aq', cha' jela' paqatzij wi kixu'an b'eyom. Chiloq'o chwe Ri'in riq'u' saq re kikojo cha' jela' kich'uq rik'ix rumá ix ch'analik y chiloq'o chwe Ri'in ri kunab'al re kikunaj riwach cha' jela' paqatzij wi kixtu'nik. ¹⁹Ri'in kanch'a'b'ej kipa y keb'enueq'il konoje ri k'ax keb'enuna'o; e uwari'che chitzelej k'u itzij chwach ri Dios ruk' ronoje ik'u'x. ²⁰Chitape!: Ri'in in k'o pan chwach ri puerta y kinch'aw k'u apanoq; we k'o junooq kuta ri nuql y kujaq lo ri puerta, Ri'in kinok b'i y kinwa' ruk', y rire kawa' wuk' Ri'in. ²¹China k'u ri kach'ijow uchuq'ab' taq ri na utz taj, kanya che katz'uyi' wuk' chupa ri nutz'ulib'al pa kintaqan wi, jela' pacha' Ri'in nuch'ijom uchuq'ab' ronoje ri na utz taj yey in tz'ul chi ruk' ri Nuqaw chupa rutz'ulib'al. ²²China k'u ri k'o utanib'al, e chuta ri kub'i'ij ri Ruxlab'ixel ri Dios chike taq riglesias, kacha!»

Ri yakb'al uq'ij ri Dios chila' chikaj

4 ¹K'isb'al k'u re taq wa', xintzu'n chikaj y xinwil jun puerta jaqatal che ruwa kaj. Y ri Jun, ri kach'aw pacha' uch'awib'al trompeta, xch'a't tanchi wuk', jewa' xub'i'ij: «Chataq'ana lo wara y Ri'in kank'ut chawe sa' taq ri katajin loq we xik'ow taq wa' wa xb'i'x chawe» xcha!. ²Xaqik'ate't, ri'in xink'oji' puq'ab' ri Ruxlab'ixel ri Dios. Xinwil k'u jun tz'ulib'al re taqanik chila' chikaj y k'o Jun tz'ul chupa. ³Ri Jun tz'ul chupa jela' katzu'nik pacha' ri chomilaj ab'aj jaspe rub'i' y pacha' ri chomilaj kaq ab'aj cornalina rub'i!. Ri tz'ulib'al sututal rij ruk' jun arco iris lik kawonik jela' pacha' ri chomilaj ab'aj esmeralda rub'i!. ⁴Yey wa tz'ulib'al sutum rij ruk' veinticuatro tz'ulib'al chik. Y xinwil veinticuatro nimaq winaq etz'ul pa ri veinticuatro tz'ulib'al, kikojom kiq'u' lik saq y k'o corona re oro che ri kijolom. ⁵Chupa k'u ri tz'ulib'al keb'el lo uyok'b'al ux'e' kaj y katataj uch'awib'al jab' karaqlajik y kajininik. Chwach k'u ri tz'ulib'al, lik kawolol wuqub' candil, wa' e ri wuqub' uwach Uxlab'ixel re ri Dios. ⁶Chwach ri tz'ulib'al kayenen jun ya' jela' pacha' ri mar y kajuljut upa pacha' chi vidrio. Y ri tz'ulib'al sutum rij kuma kajib' k'o kik'aslemal pacha' e ángeles yey jela' ketzu'n pacha' awaj y k'o uk'iyal kiwach chikij y chikiwach. ⁷Ri nab'e jela' katzu'nik pacha' juna koj, ruka'm jela' katzu'nik pacha' juna meq', rupalaj rurox jela' katzu'nik pacha' upalaj winaq y rukaj jela' katzu'nik pacha' juna águila* kaxik'ik'ik. ⁸Chikijujunal wa kajib' k'o waqitaq kixik!. Y lik k'o uk'iyal kiwach che ronoje ri kij y ruxe' ri kixik!. Yey na kekos ta k'u che ub'i'xikil chipaq'ij chichaq'ab!:

«iLik Santo, Santo, Santo ri Dios Qajawxel,
ri k'o ronoje unimal chuq'ab' puq'ab',
ri xex chi k'o lo wi, ri k'o waq'ij ora y ri k'o chiqawach
apanoq!» kecha!.

⁹Ek'u ri kajib' kakiyak uq'ij ri Dios, kakib'ixoj rub'i' y kakiya kiqasa'n re tioxib'al che ri Jun tz'ul pa ri tz'ulib'al re taqanik, ri na jinta utaqexik ruk'aslemal. ¹⁰Ek'uchiri' rike kaki'an wa', ri veinticuatro nimaq winaq kakixukub'a' kib' chwach ri Jun tz'ul pa ri tz'ulib'al y kakiloq'nimaj uq'ij ri na jinta utaqexik ruk'aslemal yey kakesaj ri kicorona re oro che ri kijolom y kakiya chwach ri tz'ulib'al y jewa' kakib'i'ij:

¹¹ «Dios Qajawxel, xew Rilal taqal che'la
kak'ul la ri yakb'al q'ij
ruma lik sa'chi ri chomal la y ri chuuq'ab' la;
ma Lal x'anaw la re ronoje ri k'olik
y lik e rajawal k'u'x la ri kek'oji' taq wa'
yey rumá ne la' xe'an taq la» kecha!.

Ri jub'otaj wuj nak'om ruk' wuqub' sellos

5 ¹Xinwil jub'otaj wuj^p k'o puq'ab' uwikiq'ab' ri Jun tz'ul chupa ri tz'ulib'al re taqanik. Ek'u wa jub'otaj wuj k'o tz'ib'ital chupa y chirij, yey nak'om ruk' wuqub' sellos.
²Xinwil k'u jun ángel lik k'o uchuq'ab' xsik'in che ub'i'xikil: «¿China ri ya'tal che kukir uwach ri jub'otaj wuj y kuloch'ij ri sellos k'o che?» xcha!. ³Yey na jinta ne junq chila' chikaj o che ruwachulew o chuxé' ulew ya'tal che kuloch'ij ri sellos nak'om che ri jub'otaj wuj re karajilaj uwach o tob' ne xa re karilo. ⁴Ek'u ri'in lik kinoq'ik, ma na jinta junq riqom ya'tal che kukir uwach ri jub'otaj wuj re karajilaj uwach o tob' ne xa re karilo. ⁵K'o k'u jun chike ri veinticuatro nimaq winaq, jewa' xub'l'ij chwe:

—Matoq' chik, ma e ri Jun Koj re ri tinamit Judá, ri ralk'o'al kan ri rey David, ri uch'ijom uchuq'ab' ronoje ri na utz taj, ya'tal k'u puq'ab' Rire kuloch'ij ri sellos y kukir uwach ri jub'otaj wuj —xcha!.

⁶Tek'uchiri' xinwilo, chwach ri tz'ulib'al re taqanik y chikixo'lib'al ri kajib' k'o kik'aslema pacha' e ángeles^q y ri nimaq winaq, chakal jun Q'apoj B'exex pacha' lik 'anom k'ax che. Wuqub' ri ruk'a' y wuqub' ruwach, wa' ke'elawi e ri wuqub' uwach Uxlab'ixel re ri Dios taqom lo che ronoje ruwachulew. ⁷Ri Q'apoj B'exex xqib'ik y xuk'am ri jub'otaj wuj k'o puq'ab' uwikiq'ab' ri Jun tz'ul pa ri tz'ulib'al. ⁸Echiri' k'o chi ri jub'otaj wuj puq'ab', ri kajib' k'o kik'aslema pacha' e ángeles y ri veinticuatro nimaq winaq xkixuk kib' xe'raqan uq'ab' ri Q'apoj B'exex. Konoje kuk'a'am ki arpa y kicopa re oro nojinaq che incienso*. Wa incienso ke'elawi e taq ri oración kaki'an rutinamit ri Dios. ⁹Y kakib'ixoj wa jun k'ak' b'ix:

«Xew Rilal taqal che'la kak'am la ri jub'otaj wuj
y kuloch'ij la taq ri sellos nak'al che,

^p 5:1 “Jub'otaj wuj”: Kil “rollo” pa vocabulario. ^q 5:6 Ap. 4:6-8

ma xya ib' la pa kamik y jek'ula' xeloq' la ruk' ri kik'el la
 konoje ruk'iyal kiwach taq ri tikawex
 che ronoje ruk'iyal uwach ch'a'temal
 y konoje taq ri tinamit cha' keb'u'ana re ri Dios.

¹⁰ X'an k'u la xa jun tinamit chike
 y x'an la chike e chakunel chwach ri Dios
 y ketaqan k'u che ruwachulew» kecha!

¹¹ Tek'uchiri' xeb'enuwil uk'iyal ángeles kisutum rij ri
 tz'ulib'al re taqanik yey kisutum kij ri kajib' k'o kik'aslema
 pacha' e ángeles y ri nimaq winaq. Ri kik'iyal wa ángeles na
 kach'ijitaj ta kajilaxik ma lik e uk'iyal millones. Yey xinto ¹²lik
 ko kesik'in che ub'i'xikil:

«Ri jun Q'apoj B'exex lik 'anom k'ax che,
 xew che Rire taqal wi kak'oji' ronoje taqanik
 y b'eyomal puq'ab',
 xew ruk' Rire k'o saqil na'oj y unimal chuq'ab',
 xew che Rire taqal wi kaxuk ib' chwach y kayak uq'ij
 rumá ri unimal uchomalil» kecha!.

¹³ Jek'ula' xeb'enuta konoje taq ri e 'anatal ruma ri Dios: ri e
 k'o chila' chikaj, ri e k'o che ruwachulew, ri e k'o chuxe' ulew
 y ri e k'o chupa ri mar, jewa' kakib'i'ij:

«Che ri Jun tz'ul pa ri tz'ulib'al y che ri Q'apoj B'exex,
 taqal ri yakb'al kiq'ij y ri kaxuk ib' chikiwach
 yey taqalik kab'i'xik k'o kichomalil y kichuq'ab'
 na jinta utaqexik» kecha!.

¹⁴ Ri kajib' k'o kik'aslema kakik'ul pan uwach: «¡Amén!*!»
 kecha!. Y ri veinticuatro nimaq winaq xkixukub'a' kib',
 xkiqasaj k'u kimejelem k'a chu'lew y xkiloq'nimaj uq'ij ri Jun
 na jinta utaqexik ruk'aslema.

Ri nab'e sello

6 ¹Xinwilo echiri' ri Q'apoj B'exex xuloch'ij ri nab'e sello
 y xinta uqul jun chike ri kajib' k'o kik'aslema pacha' e
 ángeles.^r Rire xch'aw pacha' uch'awib'al jab', jewa' xub'i'ij:
 «¡Sa'a!» xcha!. ²Xinwil k'u jun kawayu' saq rij. Yey ri kojoyom
 re ruk'a'am jun arco puq'ab' y xya' k'u jun corona che.
 Tek'uchiri' xel b'i ruk' unimal uchuq'ab' cha' rire ku'ch'ija
 uchuq'ab' ronoje.

^r 6:1 Ap. 4:6-8

Ruka'm sello

³Ek'uchiri' ri Q'apoj B'exex xuloch'ij ruka'm sello, xinta uqul ruka'm chike ri kajib' k'o kik'aslema pacha' e ángeles, jewa' xub'i'ij: «iSa'a!» xcha!. ⁴Xel chi k'u lo jun chik kawayu', wa' kaq rij. Yey ri kojoyom re xya' puq'ab' karesaj ri utzil chomal che ruwachulew y ku'an chike ri winaq kakikamisaj kib' chikiwach. Yey xya' jun nimalaj espada che.

Rurox sello

⁵Ek'uchiri' ri Q'apoj B'exex xuloch'ij rurox sello, xinta uqul rurox chike ri kajib' k'o kik'aslema pacha' e ángeles, jewa' xub'i'ij: «iSa'a!» xcha!. Xinwil k'u jun kawayu' q'eq rij, yey ri kojoyom re utzayem jun lipros^s puq'ab!. ⁶Tek'uchiri' xinta jun qulaj xch'aw lo chikixo'lib'al wa kajib' k'o kik'aslema pacha' e ángeles, jewa' xub'i'ij: «Che ri ka'ib' libra trigo utz kakoj rajil jun q'ij chak re jun mokom; yey che ri waqib' libra cebada, utz kakoj rajil jun q'ij chak re jun mokom. No'j ruwa'al ri uva y raceite, mak'o ma'an che» xcha!.

Rukaj sello

⁷Ek'uchiri' ri Q'apoj B'exex xuloch'ij rukaj sello, xinta ruqul rukaj chike ri kajib' k'o kik'aslema pacha' e ángeles, jewa' xub'i'ij: «iSa'a!» xcha!. ⁸Xinwil k'u jun kawayu' saqt'u'r rij. Ri kojoyom re, "Kamik" rub'i!, yey k'o jun teran chirij, wa' e ri rajaw ri Hades, ri luwar ke ri ekaminaq. Y xya' uchuq'ab' ri Kamik cha' keb'ukamisaj jun ukaj parte chike ri winaq che ruwachulew ruk' espada, ruk' numik, ruk' taq yab'il y kuma itzel chikop e k'o che ruwachulew.

Ruro' sello

⁹Ek'uchiri' ri Q'apoj B'exex xuloch'ij ruro' sello, xinwil chuxe' raltar* janipa ri xekamisax rumá xkitzijoj ri Tzij re ri Dios y na xkewaj ta ri kub'ulib'al kik'u'x ruk' ri Dios. ¹⁰Rike lik ko kesik'inik, jewa' kakib'i'ij: «Lal Dios Qajawxel, Rilal lik Lal jusuk' y janipa ri b'il'im la, lik e ku'ana!. ¡Jampala! kaq'at la tzij pakiwi ri tikawex e k'o che ruwachulew y ka'an k'u la uk'axel chike ri xekamisan qe?» kecha!. ¹¹Y xya' k'u kiq'u' lik

^s 6:5 "Lipro": Pa kaxtila wa' kab'i'x "balanza" che.

saq y xb'i'x chike kakoy'ej na k'enoq, ma k'amaja' katz'aqat ri kajlib'al ri kachb'i'il kekamisaxik jela' pacha' x'an chike rike.

Ruwaqaq sello

¹²Ek'uchiri' ri Q'apoj B'exex xuloch'ij ruwaqaq sello, xinwilo xaqik'ate't xpe jun nimalaj kab'raqan. Ri q'ij lik xu'an q'eq uwach jela' pacha' juna k'ul q'eq katzu'nik.^t Y ri ik' lik xu'an kaq uwach jela' pacha' katzu'n ri kik!. ¹³Y taq ri ch'umil e k'o che ruwa kaj xetzaq lo chwa ruwachulew, jela' xu'ano pacha' ri ku'an juna che' re higo k'o uwach echiri' kak'un juna nimalaj tew y kujab'aja' lo ronoje ruwach k'a rax. ¹⁴Ruwa kaj xmalka'nik jela' pacha' ku'an ri wuj echiri' kab'otik. Yey ronoje juyub' ruk' ronoje isla xjalk'atix kiluwar. ¹⁵Ek'u taq raj taqanel che ruwachulew, ri lik k'o kiwach, ri b'eyomab', ri e taqanelab' pakiwi soldados, ri lik k'o kichuq'ab', ri eloq'otal rumá kajaw yey ri na e jinta puq'ab' juna kajaw, konoje k'ut xe'kewaj kib' pa nimaq taq jul y chuxe' nimaq taq ab'aj k'o che ruwa taq juyub!, ¹⁶jewa' kakib'l'ij chike taq ri juyub' y chike ri nimaq taq ab'aj: «Chich'uqu lo qawi' y chojibewaj chwach ri Jun tz'ul pa ri tz'ulib'al re taqanik y chwach ri royowal ri Q'apoj B'exex. ¹⁷Ma xopon ri unimal q'ij re ri q'atb'al tzij. ¿Yey china k'u ri kuch'ijo katak'l' chikiwach rike?» kecha!.

Ri ciento cuarenta y cuatro mil tikawex kakoj ri retalil re ri Dios chike

7 ¹Ik'owinaq chi k'u wa', xeb'enuwil kajib' ángeles e tak'al lo chwi taq rukajchal rajlib'al ruwachulew.^u Wa' e ri kekiq'atib'ej taq ri kajib' utza'm tew che ruwachulew cha' ri tew na ku'an ta k'ax che ruwachulew, che ri mar y che taq ri che!. ²Xinwil k'u jun chik ángel xel lo pa releb'al lo ri q'ij; rire ruk'a'am ri sello re ri Dios k'aslik. Ewi lik ko xsik'in chike ri kajib' ángeles, ri xya'taj chike kaki'an k'ax che ruwachulew y che ri mar. ³Jewa' xub'l'ij chike: «Nab'e na kaqakoj ri

^t **6:12** Wa' e pacha' ri k'ul kakikoj ri tikawex ojertan echiri' kakam juna katz-kichaq' yey wa' lik tzak'an upa. ^u **7:1** "Rukajchal rajlib'al ruwachulew": Wa' ke'elawi pa norte, pa sur, pa releb'al q'ij y putzaqib'al q'ij.

retalil^v che rukurusil ri kipalaj ri e aj chak re ri Qaqaw Dios, tek'uchiri^l utz ki'an k'ax che ruwachulew, che ri mar y che taq ri che^s xcha!. ⁴Y xinta ri kajlib'al ri kojotal wa retalil chike: wa' e ciento cuarenta y cuatro mil. Rike echa'tal chikixo'lib'al konoje ri tinamit ke raj Israel.

⁵ Taq ri kojotal wa retalil chike, e wa!:

kab'lajuj mil chike ri ralk'o'al kan ri Judá,

kab'lajuj mil chike ri ralk'o'al kan ri Rubén,

kab'lajuj mil chike ri ralk'o'al kan ri Gad,

⁶ kab'lajuj mil chike ri ralk'o'al kan ri Aser,

kab'lajuj mil chike ri ralk'o'al kan ri Neftalí,

kab'lajuj mil chike ri ralk'o'al kan ri Manasés,

⁷ kab'lajuj mil chike ri ralk'o'al kan ri Simeón,

kab'lajuj mil chike ri ralk'o'al kan ri Leví,

kab'lajuj mil chike ri ralk'o'al kan ri Isacar,

⁸ kab'lajuj mil chike ri ralk'o'al kan ri Zabulón,

kab'lajuj mil chike ri ralk'o'al kan ri Benjamín,

y kab'lajuj mil chike ri ralk'o'al kan ri José.^w

Ri q'alajisanik pakiwi taq ri na e ta aj Israel

⁹ Ik'owinaq chi k'u wa', xeb'enuwil uk'iyal winaq yey na jinta junoq kach'ijow rajilaxik ri kajlib'al. Rike e petinaq chupa ronoje taq ri tinamit, chike konoje ruk'iyal kiwach taq ri tikawex che ronoje ruk'iyal uwach ch'a'temal. Rike e tak'al chwach ri Jun tz'ul pa ri tz'ulib'al re taqanik y chwach ri Q'apoj B'exex. Yey konoje e wiqital ruk' kiq'u' saq y kuk'a'am uq'ab' palma pakiq'ab!. ¹⁰Y konoje lik ko kesik'in che ub'i'xikil:

«Ri qakolob'etajik petinaq ruk' ri qa Dios

ri tz'ul pa ri tz'ulib'al, y ruk' ri Q'apoj B'exex»

kecha!. ¹¹Yey konoje ri ángeles e tak'alik, kisutum rij ri tz'ulib'al re taqanik yey kisutum kij ri veinticuatro nimaq winaq y ri kajib' k'o kik'aslemal pacha' e ángeles.^x Xkixukub'a' k'u kib', xkiqasaj kimejelem k'a chu'lew chwach ri tz'ulib'al y xkiloq'nimaj uq'ij ri Dios. ¹²Jewa' kakib'i'ij:

^v 7:3 Wa retalil kakojik e k'utub'al re, rike e k'o puq'ab' ri Dios; yey rumá k'u wa', ri k'ax kape chwi ruwachulew na jinta k'o ku'an chike rike.

^w 7:8 Taq wa b'i'aj e ke ri kab'lajuj uk'ajol kan ri Jacob, ri kab'i'x Israel che.

^x 7:11 Ap. 4:6-8

«¡Amén! ¡Amén*!

Xew che ri qa Dios taqalik kab'i'xik lik nim uq'ij,
ka'an toxinik che y kaxuk ib' chwach
yey taqal che kab'i'xik k'o unimal uchomalil,
saqil una'oj y unimal uchuq'ab'.

Yey wa' na jinta chi utaqexik taqal che Rire.
¡Amén*!» kecha!.

¹³Tek'uchiri!, xch'aw jun chike ri veinticuatro nimaq winaq,
jewa' xub'i'ij chwe:

—Taq wa kikojom kiq'u' saq, ¿e china rike y pa e petinaq
wi? —xcha!.

¹⁴Ximb'i'ij k'u ri'in che:

—Wajawal, lal eta'mayom la re —xincha!.

Ek'u rire xub'i'ij chwe:

—Konoje wa' e ri kich'ijom uchuq'ab' ri unimal k'axk'ob'ik
yey kijosq'im ri kiq'u' y ki'anom k'u saq che ruk' rukik'el
ri Q'apoj B'exex. ¹⁵Ruma k'u la' e k'o chwach ri tz'ulib'al
pa kataqan wi ri Dios y kakiloq'nimaj k'u Rire chipaq'ij
chichaq'ab' chupa ri Rocho. Ek'u ri Jun tz'ul chupa ri tz'ulib'al
kajeq' kuk', e pacha' kuch'uq kiwi' re keb'uchajij. ¹⁶Jek'ula'
na kakitij ta chi numik y tzajin chi', na kakina' ta chi ne
ruk'atanil ri q'ij y ri b'uk; ¹⁷ma ri Q'apoj B'exex ri k'o chwach
ri tz'ulib'al, e kachajin ke y kuk'am b'i kiwach pa taq ak'al
pa kalax wi lo ya' re k'aslemal. Yey e ri Dios kusu' na ronoje
ruwa'al kiwach rike —xcha!.

Ruwuq sello

8 ¹Echiri' ri Q'apoj B'exex xuloch'ij ruwuq sello nak'al
che ri jub'otaj wuj, laj junia mey ora lik xtz'intz'ot chila'
chikaj, na jinta chi k'o xtatajik. ²Tek'uchiri!, xeb'enuwil
ri wuquq' ángeles e tak'al chwach ri Dios y xya' k'u jun
trompeta chikijunal. ³Xk'un chi lo jun chik ángel y
xtak'i' chwach raltar*. Wa' ruk'a'am jun rachpom re oro. Y
xya' k'u uk'iyal incienso* che re ku'an b'i xa jun ruk' taq
ri ki oraciones konoje rutinamit ri Dios yey wa' e qasa'n
chwi raltar re oro k'o chwach ri tz'ulib'al re taqanik. ⁴Lik
kab'uqb'ut k'u ri sib' xel chupa ri rachpom k'o puq'ab' ri ángel
y xopon k'a chwach ri Dios junam ruk' taq ri ki oraciones
rutinamit ri Dios. ⁵Ek'u ri ángel xuk'am ri rachpom y
xunojisaj che ri rachq'a'l k'o chwa raltar. Tek'uchiri' xupuk'ij

lo che ruwachulew. Ewi xtataj uch'awib'al jab' karaqlajik y kajininik, y xyok' ka'n ruxe' kaj; yey xpe jun nimalaj kab'rajan.

Ri wuqub' ángeles y ri wuqub' trompetas

⁶Ri wuqub' ángeles, ri kuk'a'am ri wuqub' trompetas, xkiyib'a' kib' che uch'awisaxik taq wa'!

Kach'awisax ri nab'e trompeta

⁷Ri nab'e ángel xuch'awisaj rutrompeta, y xpe k'u saqb'ach rachb'i'il aq' ruk' kik' chwi ruwachulew. Y ruma wa' xk'at rurox parte che ruwachulew, xk'at rurox parte che ronoje taq ri che', ri tiko'n y raq'es.

Kach'awisax ruka'm trompeta

⁸Ruka'm ángel xuch'awisaj rutrompeta, y k'o xtzaq chwi ri mar pacha' juna juyub' kajumuw aq' che. Y ruma wa' rurox parte che ri mar xu'an kik' uwach. ⁹Y xekam k'u rurox parte chike rawaj e k'o chupa ri mar ye y rurox parte chike taq ri barcos e k'o chwi ri mar, xsach kiwach.

Kach'awisax rurox trompeta

¹⁰Rurox ángel xuch'awisaj rutrompeta, y jun nimalaj ch'umil kajumuw aq' che xtzaq lo chikaj puwi rurox parte che taq ri raqana' y taq rak'al pa kalax wi lo ya!. ¹¹Rub'i' wa' wa jun ch'umil e "K'a". Ewi rurox parte che taq ri nimaya' lik xu'an k'a; y uk'iyal winaq xekam ruma ruk'ayul ri ya!.

Kach'awisax rukaj trompeta

¹²Rukaj ángel xuch'awisaj rutrompeta, y lik x'an k'ax che rurox parte che ri q'ij, che ri ik' y chike ri ch'umil. Xq'ob' k'u taq ruwonib'al wa', jela' xujeq kamoymot uwach ri saq paq'ij y xu'an más q'equ'm raq'ab'.

¹³Tek'uchiri' xinwil jun águila^y kaxik'ik' chikaj y xinto jewa' kasik'in che ub'i'xikil: «iTaq'o' kiwach! iTaq'o' kiwach! iTaq'o' kiwach konoje ri ejeqel che ruwachulew ruma ri kakik'ulumaj echiri' ri oxib' ángeles kakich'awisaj ri jujun chik trompetas! iMa ya e ku'ana wa!» kacha!.

^y 8:13 Jujun versión kakib'i'ij "ángel". Ri águila e más nim chwa ri xik.

Kach'awisax ruro' trompetta

9 ¹Ruro' ángel xuch'awisaj rutrompeta, y xinwil k'u jun ch'umil xtzaq lo chikaj y xe'tzaq che ruwachulew. Xya' k'u che ri ch'umil ri lawe re ri siwan na jinta utaqexik ruchoyil upa. ²Y ri ch'umil xujaq uchi' wa siwan, y kab'uqb'ut ri sib' xel lo chupa wa' pacha' usib'ol juna nimalaj orna. Ruma k'u ri' lik xu'an q'equ'm che ruwa ri q'ij y che ruwa kaj. ³Chupa ri sib' xeb'el lo uk'iyal sak' y xkikich b'i kib' che ruwachulew. Xya' k'u pakiq'ab' ri sak' keti'o'nik pacha' sina'j. ⁴Xetaq k'u che na kaki'an ta k'ax che taq raq'es, che taq ri che', che taq ronoje ri tiko'n che ruwachulew; ma xew kaki'an k'ax chike ri winaq na jinta ri retalil ri Dios che rukurusil ri kipalaj. ⁵Na xya' ta k'u chike kekikamisaj ri winaq; xew lik kekiya pa k'axk'ob'ik wo'ob' ik', ma lik kekiti'o yey ri kitib'al e jela' pacha' ruk'axk'ol ruti'b'al sina'j. ⁶Y chupa taq k'u ri' wa' wa q'ij taq ri winaq kakitzukuj kikamik, pero na kakiriq taj; ma tob' lik kakaj kekamik, ri kamik e pacha' kanimaj chikiwach.

⁷Taq ri sak' jela' ketzu'nik pacha' ri kawayu' ewiqtalik echiri' keb'ek pa ch'a'oj. Che ri kijolom kikojom pacha' coronas re oro; taq ri kipalaj jela' katzu'nik pacha' kipalaj winaq. ⁸Yey ri kiwi' e pacha' kiwi' ixoqib', y ri ke' e pacha' ri ke' taq ri koj. ⁹Ruwa kik'u'x ch'uqutal ruk' ch'ich'. Echiri' kexik'ik'ik, ruch'awib'al ri kixik' e pacha' uch'awib'al uk'iyal kareta jek'om kuma kawayu' echiri' keb'ek pa ch'a'oj. ¹⁰E jela' pacha' ri sina'j, k'o kixul che ri kije!. Ya'om k'u kichuq'ab' che ri kije' cha' kaki'an k'ax chike ri winaq wo'ob' ik!. ¹¹Yey ri kajawal kataqan pakiwi' e ri jun ángel rajaw ri siwan na jinta utaqexik ruchoyil upa. Rub'i' pa ri ch'a'tem hebreo e "Abadón", yey pa ri ch'a'tem griego "Apolión".^z ¹²Jewa' xk'is wi ri nab'e k'axk'ob'ik. Chita na pe', ma kape chi ka'ib' k'axk'ob'ik.

Kach'awisax ruwaqaq trompetta

¹³Ruwaq ángel xuch'awisaj rutrompeta. Tek'uchiri' xinta jun qulaj xel lo chuxo'lib'al ri kajib' utza'm raltar^a re oro,

^z 9:11 Wa keb' b'ilaj e ke'elawi "ri k'isol uwach ronoje". ^a 9:13 "Utza'm raltar": Wa' jela' katzu'n pacha' ruk'a' chikop.

ri k'o chwach ri Dios. ¹⁴Wa qulaj jawa' xub'l'iij che ruwaqaq ángel, ri ruk'a'am rutrompeta: «Cheb'akira ri kajib' ángeles e yututal chuchi' ri nimaya' Eufrates» xcha!. ¹⁵Xekir k'u ri kajib' ángeles, ri e yjj'b'ital chik re kekikamisaj rurox parte chike ri winaq e k'o che ruwachulew echiri' kopon ri ora, ri q'ij, ri ik' y ri junab' cha'om chi ruma ri Dios. ¹⁶Ri'in xinta k'u ri kajlib'al ri soldados e k'o chwi kawayu' re keb'ek pa ch'a'oj, e ka'ib' ciento millones chi konoje.^b

¹⁷Y xk'ut chinuwach ruma ri Dios, taq ri kawayu' kuk' ri e k'o puwi', jawa' ketzu'nik: Kikojom ch'uqub'al uwa kik'u'x, wa' katzu'n kaq pacha' aq', azul pacha' rab'aj zafiro rub'l'i y q'an pacha' rab'aj azufre rub'l'i!. Y ri kijolom ri kawayu' e pacha' ri kijolom ri koj yey pa kichi' kel lo aq', sib' y azufre.^c ¹⁸Xekam k'u rurox parte chike ri winaq e k'o che ruwachulew ruma ri oxib' k'axk'ob'ik xel lo pa kichi' ri kawayu'; wa' e ri aq', ri sib' y ri azufre. ¹⁹Ri kichuq'ab' ri kawayu' pa kichi' y che ri kije' k'o wi. Ri kije' jela' pacha' ri kumatz, ma k'o kijolom yey ruk' wa' kaki'an k'ax chike ri winaq.

²⁰Yey e taq ri winaq na xekam ta che wa oxib' k'axk'ob'ik, na xkitzelej tane kitziij che ri na utz taj ki'anom. Na xkoq'otaj tane uloq'nimaxik kiq'ij ritzel taq uxlab'ixel y na xkoq'otaj tane uloq'nimaxik kiq'ij taq ri tiox 'anatal kuma rike ruk' oro, ruk' plata, ruk' bronce, ruk' ab'aj y ruk' che'; yey wa' na ketzu'n taj, na ketan taj y na keb'in taj. ²¹Na xkitzelej tane kitziij che taq ri kamik ki'anom, che taq ri itz ki'anom, che taq ri kaketz'ab'ej uwa kiq'ij kuk' jujun chik na kik'ulel taj y che taq releq' ki'anom.

Ri ángel k'o ralko jub'otaj wuj puq'ab'

10 ¹Tek'uchiri', xinwilo echiri' jun chik ángel lik k'o uchuq'ab' xqaj lo chila' chikaj yey sututal rij ruk' sutz' y chwi rujolom k'o lo jun arco iris. Ek'u rupalaj lik kawonik jela' pacha' ri q'ij yey taq ri raqan lik kawonik pacha' jutaq repaj aq!. ²Puq'ab' k'o ralko jub'otaj wuj^d y wa' jaqatal uwach. Xutak'ab'a' k'u ri raqan uwikiq'ab' chwi ri mar y ri raqan

^b 9:15-16 Ri kajib' ángeles e ketaqaw wa soldados cha' kaki'an wa kamik.

^c 9:17 "Azufre": Wa' echiri' kaporoxik, lik chu ri ruxlab' y keb'uya pa yab'il o pa kamik ri tikawex kesiqow re. ^d 10:2 "Jub'otaj wuj": Kil "rollo" pa vocabulario.

mox xutak'ab'a' chwi ruwachulew. ³Lik ko xsik'inik pacha' ri roq'ej jun a koj. Yey echiri' xsik'inik, xtataj wuqub' qulaj pacha' uch'awib'al jab', lik kajininik xe'ek. ⁴Echiri' xjinin ri wuqub' uch'awib'al jab', ri'in e ri' kantz'ib'aj ri xinto; pero xinta Jun xch'aw lo chila' chikaj, jewa' xub'i'ij chwe: «Ri'at xa chak'olo pawanimá' taq ri xkib'i'ij wa wuqub' uch'awib'al jab' y matz'ib'aj» xcha!.

⁵Yey ri ángel tak'al ruk' jun raqan chwi ri mar y jun chwi ruwachulew, xuyak ruq'ab' chikaj ⁶y xujikib'a' k'u uwach pub'i' ri Jun ri na jinta utaqexik ruk'aslema, ri 'anayom re ruwa kaj ruk' ronoje taq ri k'o chwach, ruwachulew ruk' ronoje taq ri k'o chwach y ri mar ruk' ronoje taq ri k'o chupa, jewa' xub'i'ij: «Ri Dios na kamayin ta chi che u'anik ri uch'ob'om loq. ⁷Ma chupa k'u ri' ri q'ij echiri' ruwuq ángel kujeq uch'awisaxik rutrompeta, ri Dios e ku'ana ri uch'ob'om loq y jela' kaq'alajin ronoje rub'i'im lo chike ri raj chak e q'alajisanelab!» xcha!.

Ri Juan kutij ri ralko jub'otaj wuj

⁸Ek'u ri Jun ch'a'tinaq lo wuk' chila' chikaj, je tanchi wa' xub'i'ij chwe: «Jat, ja'k'ama ri ralko jub'otaj wuj kirom uwach yey k'o puq'ab' ri ángel, ri tak'al ruk' jun raqan chwi ri mar y jun chwi ruwachulew» xcha!.

⁹Xin'ek k'u ri'in ruk' ri ángel y xintz'onoj che kuya ri ralko jub'otaj wuj chwe. Ek'u rire xub'i'ij chwe: «Ji', chak'ama' y chatija b'i. Ek'uchiri' k'o chi pa nuchi', lik ki' jela' pacha' ruwa'al kab', pero echiri' atijom chub'i lik ku'an k'a chupa rapa» xcha chwe.

¹⁰Ri'in xink'am k'u ri ralko jub'otaj wuj k'o puq'ab' ri ángel y xintij b'i. Ek'uchiri' k'o chi pa nuchi', lik ki' jela' pacha' ruwa'al kab'; pero echiri' nutijom chub'i, lik xu'ana k'a chupa ri nupa.

¹¹Y ri Jun xch'aw lo chwe chila' chikaj, jewa' xub'i'ij chwe: «Lik chirajawaxik ka'an tanchi q'alajisanik puwi ri kakik'ulumaj ruk'iyal taq tinamit, ruk'iyal kiwach taq ri tikawex che ruk'iyal uwach ch'a'temal y ruk'iyal aj taqanelab' e k'o che ruwachulew» xcha chwe.

Ri Rocho Dios kapajik

11 ¹Ek'uchiri', xya' jun tani panuq'ab' jela' pacha' jun a vara re pajb'al y jek'uwa' xb'i'x chwe: «Chatyaktajoq, chapaja ri Rocho Dios, chapaja raltar* y cheb'awajilaj janipa ri

kakiloq' nimaj uq'ij ri Dios chiri!. ²No'j ruwa ja k'o chwach ri Rocho Dios chaya'a kanoq; mapajo, ma la' ya'tal chi chike ri winaq na e ta aj Israel; yej rike kaki'an ke che ri tinamit Jerusalem re kakik'aq b'i uq'ij, ma ketaqan na puwi' oxib' junab' ruk' nik'aj» xcha'.

Ri ka'ib' q'alajisanelab' kakiq'alajisaj Rutzij ri Dios

³Ri'in keb'enutaq b'i ka'ib' nuq'alajisanelab' kikojom kiq'u' lik tzak'an upa^e cha' kakitzijo ri Nutzij oxib' junab' ruk' nik'aj.^f ⁴Wa' wa ka'ib' q'alajisanelab' e ri ka'ib' che' re olivo y e ri ka'ib' utzuk'ulib'al aq' e k'o chwach ri Dios Qajawxel, ri kataqan chwi ruwachulew. ⁵We k'o junoq karaj ku'an k'ax chike, kel lo aq' pa kichi' rike y ruk' wa' kekikamisaj taq ri tzel keb'ilow ke. Jek'ula' kekam ri kakaj kaki'an k'ax chike. ⁶Wa ka'ib' q'alajisanelab' ya'tal chike kakiq'atej ri jab' cha' na ku'an ta lo pa ruq'ijol echiri' ketajin che u'anik q'alajisanik; y ya'tal chike kaki'an kik' che taq ri ya' y kaki'an k'ax che ruwachulew ruk' uk'iyal k'axk'ob'ik janipa laj kakaj rike.

⁷Echiri' kik'tisom chi utzijoxik Rutzij ri Dios, ri jun nimalaj itzel chickop, ri kel lo chupa ri siwan na jinta utaqexik ruchoyil upa, kach'ojin k'u kuk', kuch'ij kichuq'ab' y keb'ukamisaj.

⁸Ek'u ri kicuerpos kateli' kan pa kakimol wi kib' ri winaq che ri nimalaj tinamit pa xkamisax wi ri Qanimajawal Jesucristo chwa cruz. Yey che wa tinamit kab'i'x "Sodoma" y "Egipto" rumátaq ri mak ka'an chila'.

⁹Y ri tikawex e petinaq chupa taq ri tinamit, chike ruk'iyal kiwach taq ri tikawex che ruk'iyal uwach ch'a'temal, oxib' q'ij ruk' nik'aj kakil ri kicuerpo telanik y na kakiya tane luwar cha' kemujqik. ¹⁰Y konoje ri winaq e k'o che ruwachulew lik keki'kot k'u ri' rumátaq kikamik wa ka'ib' q'alajisanelab'. Kaki'an k'u nimaq'ij y kakitaq taq sipanik chikiwach, ma xekam wa ka'ib' q'alajisanelab' re ri Dios, ri xekiya pa k'axk'ob'ik ri winaq che ruwachulew.

¹¹Ek'uchiri' ik'owinaq chi oxib' q'ij ruk' nik'aj, ri Dios xuya chike wa ka'ib' q'alajisanelab' keb'uxlab'ik y kak'oji' tanchi

^e 11:3 Ri kiq'u' kikojom ri ka'ib' q'alajisanelab' e pacha' ri kakikoj ri tikawex ojertan echiri' kakam juna katz-kichaq!. ^f 11:3 Pa ri ch'a'tem griego kub'i'ij "mil doscientos sesenta q'ij".

kik'aslem. Xeyaktaj k'u ri' y xetak'i'ik. Y konoje ri xeb'ilow ke, xok unimal xi'in ib' kuk!.

¹²Ek'u ri ka'ib' q'alajisanelab' xkita Jun lik ko xch'aw lo chila' chickaj, jewa' xub'il'ij chike: «Chixaq'ana lo wara» xcha!. Ek'u rike xeb'el b'i chickaj chupa jun sutz' y xeb'ilitaj kuma ri tzel xeb'ilow ke.

¹³Chupa k'u la' la joq'otaj xpe jun nimalaj kab'raqan y lajuj parte che ri tinamit xwuluwub'ik; y ruma wa' e wuqub' mil ri winaq xekamik. Ek'u ri na xekam taj, xok jun xi'in ib' kuk' y xkiyak uq'ij ri Dios k'o chila' chickaj. ¹⁴Jewa' xk'is wi ruka'm k'axk'ob'ik, pero rurox k'axk'ob'ik katajin loq.

Kach'awisax ruwuq trompeta

¹⁵Ruwuq ángel xuch'awisaj rutrompeta, y xetataj kowilaj taq qulaj kech'aw lo chila' chickaj, jewa' kakib'i'ij:

«Konoje taq ri tinamit che ruwachulew
k'o chi puq'ab' ri Dios Qajawxel
y puq'ab' Rucha'o'n lo Rire;
yey wa taqanik na jinta chi utaqexik» kecha!.

¹⁶Ek'u ri veinticuatro nimaq winaq etz'ul pa ri kitz'ulib'al chwach ri Dios, xkixukub'a' kib', xkiqasaj kimejelem k'a chu'lew y xkiloq'nimaj uq'ij ri Dios. ¹⁷Jewa' kakib'i'ij:

«Kaqatioxij che'la, ma Lal Dios Qajawxel
k'o ronoje unimal chuq'ab' paq'ab' la,
Lal ri Dios k'o waq'ij ora, ri xex chi k'o lo wi, y ri k'o
chiqawach apanoq;
ma k'utum la ri chuq'ab' la
y jeqom chi ri taqanik la paqawi ri'oj.

¹⁸E taq k'u ri tinamit che ruwachulew
lik xpe koyowal chi'ij la.
No'j wo'ora xopon ruq'ijol ri oyowal la,
ri q'ij re kaq'at la tzij pakiwi taq ri ekaminaq.
Kaya k'u la ri rajil uk'axel chike ri q'alajisanelab' e aj chak la
kuk' ri jujun chik e k'o paq'ab' la,
ri lik kakiloq'nimaj uq'ij ri b'i' la,
tob' lik k'o kiwach o na jinta kiwach;
yey kasach k'u la kiwach ri' ri kesachaw kiwach
taq ri winaq wara che ruwachulew» kecha!.

¹⁹Ek'u ri Rocho Dios chila' chickaj, xteq'eb'axik; y xilitaj pan chupa, ri kaxa re ri tzij u'anom ri Dios kuk' rutinamit. Ek'uchiri!,

xyok' ka'n ruxe' kaj, xetataj uch'awib'al jab' karaqlajik y kajininik; yey xpe jun kab'raqan, y xu'an nimaq taq saqb'ach.

Rixoq y ri dragón

12 ¹Xwinaqir k'u che ruwa kaj jun nimalaj k'utub'al: K'o jun ixoq upisom rib' chupa ri q'ij, wa' u'anom pacha' uq'u' che. Ek'u ri ik' chux'e' ri raqan k'o wi, y k'o jun corona che rujolom yey wa corona k'o kab'lajuj ch'umil che. ²Rire yewa' ixoq y lik kasik'inik ma e ri' kutzir uwach yey ruma wa' lik k'o pa k'ax.

³Xwinaqir k'u jun chik k'utub'al che ruwa kaj: Wa' e jun nimalaj dragón* kaq rij, k'o wuqub' ujolom y lajuj ruk'a!. Chujujunal rujolom kojom jun diadema che. ⁴Ruk' ruje' xeb'ujokokej b'i ri urox parte chike taq ri ch'umil e k'o che ruwa kaj y xeb'uk'aq b'i che ruwachulew. Ek'u ri dragón xtak'i' chwach rixoq echiri' ya e ri' kutzir uwach cha' kutij b'i ri ralko ralab' maji chik echiri' kalaxik. ⁵Xutzir k'u uwach rixoq y xalax jun ralko ralab!. Y ruchak wa' wa ralab' e kataqan ruk' jun vara ch'ich' pakiwi konoje taq ri tinamit e k'o che ruwachulew. Ek'u ri ralko ralab' rixoq xk'am b'i chikaj ruk' ri Dios pa k'o wi rutz'ulib'al re taqanik. ⁶Ek'u rixoq xanimaj b'i, xe'ek pa jun luwar katz'intz'otik pa yijb'am wi ruluwar ruma ri Dios, cha' chiri' katzuq wi oxib' junab' ruk' nik'aj.^g

⁷Tek'uchiri', xjequer jun nimalaj ch'a'oj chila' chikaj: Ri Miguel kuk' ri ángeles e k'o puq'ab' xech'ojin ruk' ri dragón. Y jek'ula' ri dragón kuk' ri ángeles e k'o puq'ab' xech'ojin ruk' ri Miguel. ⁸Pero ri dragón kuk' taq ru ángeles na xkich'ij ta kichuq'ab' ri Miguel kuk' ri ángeles e k'o ruk'. Y na xya' ta chi k'u chike kek'oji' chila' chikaj. ⁹Xk'aq b'i ri nimalaj dragón, wa' e ri kumatz re ojertan,^h ritzel winaq Satanás* rub'l'i, ri katajin che kisokoso'xik konoje taq ri winaq che ruwachulew. Xk'aq k'u b'i che ruwachulew junam kuk' ru ángeles.

¹⁰Tek'uchiri' xinta jun qulaj lik ko xch'aw chila' chikaj, jewa' kub'l'i'ij:

«Wo'ora ri Dios eb'ukolob'em chi rutinamit yey ri jeqeb'al re rutaqanik xu'an ruk' unimal uchuq'ab' y uya'om chi ri taqanik puq'ab' Rucha'o'n lo Rire. Ma k'aqom chub'l'i ri jun kutz'aq

^g 12:6 Pa ri ch'a'atem griego kub'l'i'ij “mil doscientos sesenta q'ij”.

^h 12:9 Gn. 3:1

kichi' ri qa hermanos chipaq'ij chichaq'ab' chwach ri Dios. ¹¹E taq ri qa hermanos xkich'ij uchuq'ab' ri dragón ruma rukik'el ri Q'apoj B'exex y ruk' ri Utzilaj Tzij xkitzijoj rike, yey na xkixi'ij tane kib' chwach taq ri kakik'ulumaj tob' ne xekamisaxik. ¹²E uwari'che chixki'kota ri'ix, ri ix jeqel wara chikaj. Pero lik toq'o' k'u kiwach taq ri e k'o che ruwachulew y ri e k'o chupa ri mar, ma ritzel winaq qajinaq piwi ri'ix y lik sa'ch ri royowal, ma reta'am xa ajilam chi ri q'ij ya'tal che» kacha!.

Ritzel winaq y ri tinamit Israel

¹³Echiri' ri dragón xrilo esam chi lo chikaj, lik xuternab'ej rixoq, ruchu ri ralko ala. ¹⁴Pero che rixoq xya' ka'ib' nimaq taq uxik' pacha' uxik' águila*, cha' jela' kaxik'ik'ik kanimaj b'i chwach ri kumatzⁱ pa ri luwar katz'intz'otik, pa ri luwar yib'am chi che, pa katzuq wi oxib' junab' ruk' nik'aj. ¹⁵Ek'u ri kumatz xuxab'ej lo ya' puchi' chirij rixoq, wa' e pacha' juna nimaya' re kucharej b'i. ¹⁶Pero rulew xuto' rixoq, ma xjaqatajik y xutz'ub' b'i ri nimaya' uxab'em lo ri kumatz puchi!. ¹⁷Ruma k'u la', ri kumatz lik xpe royowal chirij rixoq y xu'ana ch'a'oj kuk' taq ri ralk'o'al kan rixoq, wa' e taq ri kakitaqej Rutzij Upixab' ri Dios y kakitzijoj ri Utzilaj Tzij re ri Qanimajawal Jesucristo.

Ritzel chikop kel lo chupa ri mar

13 ¹Ri'in xintak'i' chwi ri sanyeb' chuchi' ri mar y xinwilo echiri' chupa ri mar xel lo jun nimalaj itzel chikop wuqub' rujolom y lajuj ri ruk'a!. Chujujunal rujolom kojom jun diadema che y chujujunal ri wuqub' ujolom tz'ib'ital jun b'i'aj re k'aqib'al b'i uq'ij ri Dios. ²Wa nimalaj itzel chikop jela' katzu'nik pacha' juna b'alam, yey taq ri raqan e pacha' raqan oso y ruwa re' e pacha' uwa re' koj. Ek'u ri dragón^j xuya uchuq'ab' ri nimalaj itzel chikop, xuya rutz'ulib'al re taqanik che y lik xuya uwach. ³Xinwil k'ut, lik 'anom k'ax che jun chike taq rujolom ri nimalaj itzel chikop, yey lik kajek'ow ruk!. Pero wa' wa k'ax xkunutajik y ruma k'u ri' konoje ri winaq che ruwachulew lik xkam kanima' che y e xkitaqej ri nimalaj itzel chikop. ⁴Lik xkiloq'nimaj k'u uq'ij ri dragón* ri xya'w uchuq'ab' ri nimalaj itzel chikop. Y jenela' xkiloq'nimaj

ⁱ 12:14 Ap. 12:9 ^j 13:2 Ap. 12:3

uq'ij ri nimalaj itzel chikop, jewa' kakib'l'ij: «¿China chi junoq jewa' pacha' wa jun nimalaj itzel chikop? ¿K'o nawi junoq kach'ijow uchuq'ab'? iNa jintaj!» kecha!.

⁵Xya'taj che ri nimalaj itzel chikop kutak'ab'a' uq'ij y lik tzel kach'a't chirij ri Dios. Y xya' k'u uchuq'ab' re kataqan che ruwachulew oxib' junab' ruk' nik'aj.^k ⁶Xujeq k'u lik tzel kach'a't chirij ri Dios, chirij rub'i' ri Dios, chirij ri Rocho Dios y chikij taq ri e k'o chila' chikaj. ⁷Y xya' k'u puq'ab' kach'o'jin chikij rutinamit ri Dios y kuch'ij kichuq'ab'. Jenela' xya' puq'ab' kataqan pakiwi konoje taq ri tinamit, konoje ruk'iyal kiwach taq ri tikawex che ronoje ruk'iyal uwach ch'a'temal. ⁸Xkiloq'nimaj k'u uq'ij ri nimalaj itzel chikop konoje ri winaq che ruwachulew, ri na jinta kib'i' chupa ri libro re k'aslemal re ri Q'apoj B'exex, ri Jun chwi lo ri jeqebl'al re ruwachulew cha'om chi loq re kakamisaxik.^l

⁹China k'u ri k'o utanib'al che utayik, ichuta k'u ri!!

¹⁰China ri ya'tal che kak'am b'i chi presoyil,

ri' kak'am na ub'i;

y china ri ya'tal che kakam ruk' espada,

ri' ruk' espada kakamisaxik.

E uwari'che chirajawaxik wi rutinamit ri Dios kakichuq'ub'ej kib' chwach ri k'axk'ob'ik y kakitikib'a' ri kub'ulib'al kik'u'x ruk' ri Dios.

Ritzel chikop kel lo chupa ri juyub' taq'aj

¹¹Tek'uchiri', xinwilo echiri' jun chik nimalaj itzel chikop xel lo chupa ri juyub' taq'aj, k'o k'u ka'ib' ruk'a' pacha' ruk'a' juna q'apoj b'exex pero kach'a't pacha' juna dragón. ¹²Yey wa uka'm nimalaj itzel chikop xya' puq'ab' kataqan pacha' ri nab'e nimalaj itzel chikop y ku'an k'u rutaqanik chwach. Xeb'utaq k'u konoje ri winaq che ruwachulew cha' lik kakiloq'nimaj uq'ij ri nab'e nimalaj itzel chikop, ri xkunutaj che ri jun k'ax xjek'ow ruk!. ¹³Lik ku'an nimaq taq k'utub'al chikiwach ri winaq, ma ku'ano katzaq ne lo aq' chwi ruwachulew.

¹⁴Keb'usok k'u konoje ri winaq ruk' taq ri k'utub'al ya'tal che ku'an chwach ri nab'e nimalaj itzel chikop. Y keb'utaq ri winaq cha' kaki'an jun uk'axwach ri nab'e nimalaj itzel chikop, ri lik x'an k'ax che ruk' espada yej na xkam taj. ¹⁵Y

^k 13:5 Pa ri ch'a'tem griego kub'l'ij “cuarenta y dos ik!”. ^l 13:8 1P. 1:19-20

xya'taj k'u che kuya uk'aslem ruk'axwach ri nab'e nimalaj itzel chikop, cha' jela' utz kach'awik y kutaq kikamisaxik konoje ri winaq na kakiloq'nimaj ta uq'ij. ¹⁶ Yey wa uka'm nimalaj itzel chikop xtaqan che kakoj jun retalil chike konoje ri winaq, wa' e taq ri lik k'o kiwach y ri na jinta kiwach, ri b'eyomab' y ri e nib'a'ib', ri eloq'otal ruma kajaw y ri na e jinta puq'ab' juna kajaw; chike k'u konoje xkoj wa jun retalil che ri kiq'ab' uwikiq'ab' o che rukurusil ri kipalaj. ¹⁷ Jek'ula', na jinta junq ya'tal che kalooq'owik o kak'ayinik we na kojom ta che rire ri jun retalil, wa' e rub'i' ri nimalaj itzel chikop o ri rajlib'al rub'i'. ¹⁸ Wa' lik karaj na'oj cha' kamajtaj usuk!. China k'u ri lik kumaj usuk!, e churajilaj ri rajlib'al ri nimalaj itzel chikop, ma ri rajlib'al e re jun tikawex; yey ri rajlib'al e wa': 666.

**Ri ciento cuarenta y cuatro mil
tikawex kakib'ixoj jun k'ak' b'ix**

14 ¹Tek'uchiri', xinwil ri Q'apoj B'exex tak'al chwi ri juyub' Sion* y ruk! Rire e k'o ciento cuarenta y cuatro mil tikawex, yey che rukurusil ri kipalaj tz'ib'ital rub'i' Rire y rub'i' Ruqaw. ²Y xinta jun ch'awib'al re chila' chikaj katatajik pacha' utza'm ya' echiri' kak'unik y uch'awib'al unimal jab'; y ri ch'awib'al xinto e pacha' uk'iyal tikawex e ri' kakich'awisaj ri ki arpas. ³Y kakib'ixoj jun k'ak' b'ix chwach ri Jun tz'ul chupa ri tz'ulib'al re taqanik, chikiwach ri kajib' k'o kik'aslemal pacha' e ángeles^m y chikiwach ri nimaq winaq.ⁿ Yey ri emajayom re wa b'ix xew e ri ciento cuarenta y cuatro mil xekolob'etaj chikixo'l ri winaq che ruwachulew, ma xew chike rike ya'tal wi kakimaj wa jun b'ix. ⁴E taq achijab' wa' na xkimin ta kib' kuk' ixoqib!. Rike e keterej chirij ri Q'apoj B'exex tob' pachawi ke'ek wi. Wa' e ri xekolob'etaj chikixo'l ri winaq che ruwachulew re keb'u'an pacha' ri nab'e qasa'n chwach ri Dios y chwach ri Q'apoj B'exex. ⁵Yey na jinta k'ana raq'ub'al xtataj chikichi' ma lik chom ri kib'inik kisilab'ik chwach ri Dios.

Ri kakitzijo roxib' ángeles

⁶Tek'uchiri', xinwil jun chik ángel kaxik'ik' chikaj. Rire uk'amom lo ri Utzilaj Tzij na jinta utaqexik cha' kutzijoj wa'

^m 14:3 Ap. 4:6-8 ⁿ 14:3 Ap. 4:4

chike konoje ri winaq e k'o che ruwachulew, chike konoje taq ri tinamit y konoje ruk'iyal kiwach taq ri tikawex che ronoje ruk'iyal uwach ch'a'temal. ⁷Ri ángel jewa' kasik'in che ub'l'i'xikil: «Chixi'ij iwib' chwach ri Dios y chiloq'nimaj uq'ij ma xopon ru orayil ri q'atb'al tzij ku'ano; chiyaka k'u uq'ij ri x'anaw re ruwa kaj, ruwachulew, ri mar y taq rak'al pa kalax wi lo ri ya!» kacha!

⁸Tek'uchiri!, xk'un ruka'm ángel jewa' kub'i'ij: «E la' xtzaqik! E la' xtzaq ri nimalaj tinamit Babilonia, ri xeb'uq'ab'arisaj konoje taq ri tinamit y xeb'umin pa mak cha' ruk' ri kirayib'al kaketz'ab'ej kiq'ij kuk' jujun chik na kik'ulel taj» kacha!.

⁹Tek'uchiri!, xk'un rurox ángel y kasik'in che ub'l'i'xik: «We k'o junq kuloq'nimaj uq'ij ri nimalaj itzel chikop y ri jun uk'axwach u'anom yey kuk'ul ri retalil che rukurusil rupalaj o che ruq'ab', ¹⁰ri' kutij na ri k'axk'ob'ik kape ruma ri royowal ri Dios; y kak'aq k'u b'i pa ri aq' kajinow ruk' azufre.^o Yey ka'an wa' che chikiwach taq ri santowilaj ángeles y chwach ri Q'apojo B'ejex. ¹¹Rusib'ol wa k'axk'ob'ik kab'uqlanik kel chikaj y na jinta chi k'isb'al re. Ek'u ri kakiloq'nimaj uq'ij ri nimalaj itzel chikop ruk' ri jun uk'axwach u'anom yey kakik'ul ri retalil rub'i', chike k'u rike na jinta k'ana uxlanem chipaq'ij chichaq'ab!» kacha!. ¹²E uwari'che chirajawaxik che rutinamit ri Dios, wa' e ri kitaqem Rutzij Upixab' ri Dios y lik kub'ul kik'u'x ruk' ri Qanimajawal Jesucristo, kakichuq'ub'ej kib' chwach taq ri k'axk'ob'ik.

¹³Ek'uchiri!, xinta jun qulaj xch'aw lo chila' chikaj, jewa' kub'i'ij lo chwe: «Chatz'ib'aj: Chwi k'u wo'ora, lik nim kiq'ij kalaxik ri kekam chupa rub'i' ri Qanimajawal Jesucristo» kacha!.

«Qatzij,» kacha ri Ruxlab'ixel ri Dios, «ma rike keb'uxlan che taq ri kichak, yey ronoje ri utzilaj chak ki'anom na kasach ta uwach ma kakik'ul rajil uk'axel chila' chikaj» kacha!.

Ri q'atb'al tzij kape che ruwachulew

¹⁴Tek'uchiri!, xinwil jun sutz' lik saq y chwi k'u ri' wa' k'o Jun tz'ulik, kilitajik e Ralaxel Chikixo'l Tikawex.^p Che

^o **14:10** “Azufre”: Wa' echiri' kaporoxik, lik chu ri ruxlab' y keb'uya pa yab'il o pa kamik ri tikawex kesiqow re. ^p **14:14** Dn. 7:13

k'u rujolom k'o jun corona re oro y puq'ab' ruk'a'am jun jos^q lik k'o re!. ¹⁵Chupa k'u ri Rocho Dios xel lo jun chik ángel, jewa' ri kasik'in pan che ub'i'xikil che ri Jun tz'ul chwi ri sutz!: «Kojo la ri jos che taq ri tiko'n k'o che ruwachulew ma ya xri'job' ruwach; 'ana k'u la ri molonik ma ruq'ijol wa' ya xoponik» kacha!. ¹⁶Ek'u ri Jun tz'ul chwi ri sutz' xukoj rujos che taq ri tiko'n k'o che ruwachulew y jela' xu'an ri molonik.

¹⁷Chupa k'u ri Rocho Dios chila' chikaj xel lo jun chik ángel ruk'a'am jun jos lik k'o re!. ¹⁸Xel k'u lo jun chik ángel chwa raltar; rire ya'tal puq'ab' kataqan puwi ri aq!.^r Lik ko k'u xsik'in pan che ri jun k'o ri jos lik k'o re' puq'ab', jewa' kub'l'i'j pan che: «Chachapa rujos lik k'o re' y chaq'ata ri jutaq chuya'l'j uvas che taq ri tiko'n re uvas k'o che ruwachulew, ma lik q'an chik» kacha!. ¹⁹Ri ángel xuchap rujos y xuq'at ri jutaq chuya'l'j uvas che taq ri raqan uvas k'o che ruwachulew yey xumol uchi' pa kapuch' wi; wa' ke'eloq e pa kuq'at wi tzij ri Dios pakiwi ri tikawex. ²⁰Xpuch'l' k'u ri uva chupa ri puch'ub'al k'o lo naj che ri tinamit yey chupa wa' xel lo kik!. Ri kik' xel che, xu'an pacha' ya' kayenenik. Runajtijil raqan ri kik' xumaj trescientos kilómetros yey ruchoyil upa e jun metro ruk' nik'aj.^s

Ri ángeles kakik'am lo wuqub' k'axk'ob'ik

15 ¹Xinwil jun chik nimalaj k'utub'al chila' chikaj
yey wa' lik na jinta k'ana k'o wi: E wuqub' ángeles
kakik'am lo ri wuqub' k'isb'al k'axk'ob'ik; yey ruk' wa' kak'is
wi ri royowal ri Dios.

²Tek'uchirí', xinwil jun mar katzu'n pacha' vidrio yey kawon aq' chupa. Konoje ri na xesokotaj ta ruma ri nimalaj itzel chikop, na xexuki' tane chwach ri jun uk'axwach y na xkiya tane luwar kakoj chike ri retalil re ri rajlib'al rub'i' ri nimalaj itzel chikop, konoje rike e tak'al chwi ri mar katzu'n pacha' vidrio y kuk'a'am ri ki arpa ya'tal chike ruma ri Dios. ³E kakib'ioxj k'u ri b'ix re ri Moisés^t ri raj chak ri Dios y kakib'ioxj ri b'ix re ri Q'apoj B'exex, jewa' kakib'l'ij:

^q 14:14 “Jos”: Wa' ke'eloq “hoz” pa kaxtila. ^r 14:18 Wa jun ángel laj e ri kuchajij ri aq' chwi raltar o e ángel ya'tal puq'ab' kuya pa k'ax ruwachulew ruk' aq!. Ap. 16:8 ^s 14:20 “Jun metro ruk' nik'aj”: Pa ri ch'a'tem griego kub'l'ij: “Ri kik' xopon ne k'a xe' ke' taq ri kawayu', k'a pa kak'oji' wi ri preno chike”. ^t 15:3 Éx. 15:1

Lal Dios Qajawxel, ri k'o ronoje unimal chuq'ab' paq'ab'
la.

Lik nima'q y lik chomilaj taq ri chak 'anom la,
lik jusuk' y lik usuk' ronoje ri ka'an la,
Lal ri Taqanel pakiwi taq ri tinamit.

⁴ ¿K'o nawi junioq na kuxi'ij ta rib' chiwach la, Lal Qajawal?
¿Y k'o nawi junioq na kuyak ta uq'ij ri b'i' la?
Ma xew Rilal lik Lal santo.

E uwari'che konoje taq ri tinamit che ruwachulew
kek'unik y ko'l kiloq'nimaj q'ij la,
ma q'alajisam la ri jusuk' q'atb'al tzij la pakiwi'

kecha!.

⁵ Tek'uchiri', xinwilo echiri' xteq'eb'ax ri Rocho Dios
chila' chikaj pa k'o wi ri kaxa re ri tzij u'anom ri Dios kuk'
rutinamit.^u ⁶ Chupa k'u ri Rocho Dios xeb'el lo wuqub'
ángelos, ri ya'tal chike kekiya pa k'axk'ob'ik taq ri winaq
che ruwachulew. Kikojom k'u kiq'u' 'anatal ruk' k'ul lino ye
wa' lik saq y lik kawonik, ye chwa kik'u'x kojotal jun pas re
oro. ⁷ Jun k'u chike ri kajib' k'o kik'aslema pacha' e ángeles^v
xuya chike ri wuqub' ángeles jujun copas* re oro nojinaq che
ri royowal ri Dios, ri na jinta utaqexik ruk'aslema. ⁸ Ek'u ri
Rocho Dios xnoj che sib' ruma runimal uchomalil y ruchuq'ab'
ri Dios. Nab'e na k'ut kik'ow wa wuqub' k'axk'ob'ik kik'amom
lo ri wuqub' ángeles, k'a ek'uchiri' utz kok junioq pa ri Rocho
Dios.

Ri wuqub' copas* re k'axk'ob'ik

16 ¹ Chupa ri Rocho Dios chila' chikaj xinta jun lik ko
kach'awik, jewa' kub'i'ij pan chike ri wuqub' ángeles:
«Jix y ji'q'eja che ruwachulew ri royowal ri Dios, ri k'o chupa
ri wuqub' copas» kacha!.

Ri nab'e copa

² Xe'ek k'u ri nab'e ángel y xu'q'eja chwi ruwachulew ri k'o
chupa rucopa, y ruma wa' xwinaqir jun k'axlaj yab'il re ch'a'l'k
chikij taq ri winaq y xujeq k'u ri' kaq'olol kij konoje, wa' e ri
xek'uluw ri retalil ri nimalaj itzel chikop y xkiloq'nimaj uq'ij
ri jun uk'axwach 'anom.

^u 15:5 Ap. 11:19 ^v 15:7 Ap. 4:6-8

Ruka'm copa

³Ruka'm ángel xu'q'eja chwi ri mar ri k'o chupa rucopa, y ruma wa' xu'an kik' uwach ri mar pacha' rukik'el juna tikawex kamisam; y xekam k'u konoje taq rawaj e k'o chupa ri mar.

Rurox copa

⁴Rurox ángel xu'q'eja ri k'o chupa rucopa chwi taq ri nimaya' y chwi taq rak'al pa kalax wi taq lo ri ya'; y ruma wa' ronoje ri ya' xu'an kik' uwach. ⁵Tek'uchirí' xinta ri ángel ri ya'tal taq ri ya' puq'ab', jewa' kub'i'ij:

«Lal Dios Qajawxel ri k'o waq'ij ora y ri xex chi k'o lo wi, xew Rilal lik Lal Santo, ma lik Lal jusuk' che ri q'atb'al tzij 'anom la ⁶pakiwi ri xekamisan ke ri tinamit la y taq ri q'alajisanelab' e la. Xki'an k'u chike xturuw ri kikik'el. E uwari'che lik Lal jusuk' ma x'an la chike wa e kamisanel kakiqum kik'. iEk'u lik taqal wa' chike!» kacha!

7Ewi xinta jun chik xch'aw lo chwa raltar*, jewa' kub'i'ij:

«Paqatzij wi, lal Dios Qajawxel, Rilal k'o ronoje unimal chuq'ab' paq'ab' la, ma ri q'atb'al tzij ka'an la lik e usuk' y lik jusuk'» kacha!.

Rukaj copa

⁸Rukaj ángel xu'q'eja chwi ri q'ij ri k'o chupa rucopa, jela' k'u ri' xya'taj che ri q'ij keb'uk'atisaj konoje ri winaq ruk' ruk'atib'al. ⁹Y lik xek'at k'u ri winaq ruma ruk'atib'al ri q'ij. Ruma k'u wa', xeyajan ruk' itzel taq ch'a'tem chirij ri Dios, ri k'o puq'ab' kutaq lo wa k'axk'ob'ik pakiwi!. Yey na xkitzelej tane kitzij, ma e na xkaj taj kakiyak uq'ij ri Dios.

Ruro' copa

¹⁰Ruro' ángel xu'q'eja ri k'o chupa rucopa chwi ri tz'ulib'al pa kataqan wi ri nimalaj itzel chikop, y ruma wa' xu'an q'equ'm upa taq ri tinamit k'o puq'ab' ri nimalaj itzel chikop. Konoje taq k'u ri winaq lik kakikach'aka' upa ri kaq' ruma ri k'ax. ¹¹Lik k'ut tzel xech'a't chirij ri Dios k'o chila' chikaj ruma taq ri k'axk'ob'ik y taq ri ch'a'k chikij; y na xkitzelej ta kitzij chwach ri Dios che taq ri na utz taj ki'anom.

Ruwaqaq copa

¹² Ruwaqaq ángel xu'q'eja pa ri nimaya! Eufrates ri k'o chupa rucopa; y ruma wa', xchaqij ri ya' pa ri nimalaj raqana', cha' jela' utz keb'ik'ow lo ri taqanelab' e petinaq pa releb'al lo ri q'ij. ¹³ Y xinwil k'u oxib' itzelilaj uxlab'ixel jela' ketzu'nik pacha' tutz'; jun kel lo puchi' ri dragón*, jun chik kel lo puchi' ri nimalaj itzel chikop y jun chik kel lo puchi' ri jun q'alajisanel sokoso'nel. ¹⁴ Wa' e itzel uxlab'ixel kaki'an taq k'utub'al y keb'ek kuk' konoje ri taqanelab' che ronoje ruwachulew cha' kakimol kichi' re kaki'an ch'a'oj chupa ri unimal q'ij re ruq'atb'al tzij ri Dios, ri k'o ronoje unimal chuq'ab' puq'ab!. ¹⁵ Jewa' kub'i'ij ri Qanimajawal:

«Chitape', Ril'in kinopon iwuk' jela' pacha' ri okib'al re juná eleq'om pa juná ja, ma ri eleq'om na kub'i'ij ta apanoq jampala' koponik.^w Lik k'u nim uq'ij ralaxik china ri na kawar taj yey ukojom chi ruq'u' cha' we xink'unik, na kuya ta uk'ix» xcha'.

¹⁶ Y xkimol k'u kichi' ri taqanelab' chupa ri jun luwar rub'i' pa ri ch'a'tem hebreo “Armagedón”.^x

Ruwuq copa

¹⁷ Ruwuq ángel xu'q'eja pa ri tew ri k'o chupa rucopa; y lik ko xch'aw lo jun qulaj pa ri tz'ulib'al re taqanik k'o chupa ri Rocho Dios chila' chikaj, jewa' kub'i'ij:

—Xk'is k'u wa q'atb'al tzij^y —kacha!. ¹⁸ Tek'uchiri' lik xyok' ka'n ruxe' kaj, xetataj uch'awib'al jab' karaqlajik y kajininik; yey xpe jun nimalaj kab'raqan che ruwachulew, wa' e kab'raqan más nim u'anom chwi lo ri kik'oji'ik ri tikawex che ruwachulew. ¹⁹ Ruma k'u wa', ri nimalaj tinamit xjaqtaj upa, oxib' xu'ano; y konoje taq ri jujun chik tinamit e k'o che ruwachulew xewuluwub'ik. Ek'u ri Dios na xik'ow ta chuk'u'x taq ri mak u'anom ri nimalaj tinamit Babilonia; xuya k'u pa k'axk'ob'ik ruma ri unimal royowal Rire chirij. ²⁰ Yey ruma k'u wa kab'raqan konoje taq ri islas y taq ri juyub' xesachik.

²¹ Y xtzaq lo chikaj nimaq taq saqb'ach pakiwi ri tikawex. Ri ra'lal wa' laj jun quintal chujujunal. Ruma k'u ri k'axk'ob'ik

^w 16:15 Mt. 24:43 ^x 16:16 “Armagedón”: Wa' ke'elawi “juyub' re Meguido”. ^y 16:17 Ruk' ri wuqub' copas re k'axk'ob'ik, xk'is ri royowal ri Dios. Ap. 15:1

re ri nimaq taq saqb'ach, ri winaq lik tzel xech'a't chirij ri Dios, ma ri k'axk'ob'ik xu'ano lik xib'ib'al uwach.

Ri q'atb'al tzij puwi rixoq na chom ta ub'inik

17 ¹Xk'un k'u jun chike taq ri wuqub' ángeles, ri k'o ri wuqub' copas* re k'axk'ob'ik pakiq'ab!. Xch'a't k'u wuk', jawa! xub'i'ij chwe: «Sa'a wara y kank'ut chawach ri q'atb'al tzij ka'an puwi ri jun ixoq na chom ta ub'inik, ri tz'ul chwi taq ri ya!. ²Ruk' wa' wi'xoq emakuninaq taq wi ri taqanelab' che ruwachulew y konoje ri winaq ejeqel che ruwachulew, ma eq'ab'arinaq ruma ri vino xuya rixoq chike»^z xcha!.

³Tek'uchiri', chupa ri xk'ut chinuwach ruma ri Ruxlab'ixel ri Dios, ri ángel xinuk'am b'i chupa jun luwar katz'intz'otik y chila' xinwil jun ixoq tz'ul chwi jun nimalaj itzel chikop kaq rij, yey wa' tz'ib'ital uk'iyal b'i'aj chirij re k'aqib'al b'i uq'ij ri Dios. Wa' k'o wuqub' ujolom y lajuj ruk'a!. ⁴Rixoq uwiqom rib' ruk' k'ul morato^a uwach y kaq uwach; yey wiqital ruk' oro, ruk' chomilaj taq ab'aj y ruk' perlas*. Ruk'a'am jun copa re oro puq'ab' nojinaq che taq ri lik k'ixb'al uwach y che ruch'lil ri mak ku'an kuk' taq rachijab!. ⁵K'o k'u jun b'i'aj tz'ib'ital che rukurusil rupalaj yey lik k'ayew umajik usuk'; e b'i'aj wa':

Ri nimalaj tinamit Babilonia
e kichu rixoqib' lik ch'ul kib'inik kisilab'ik,
y ruk' rire petinaq wi ronoje ri lik k'ixb'al uwach ka'an
che ruwachulew.

⁶Tek'uchiri' xinwil rixoq lik kaq'ab'ar ruk' ri kikik'el rutinamit ri Dios y ri xekamisax ruma ri xkitzijoj ri Utzilaj Tzij re ri Jesús. Ek'u ri'in lik xkam wanima' che ri xinwilo.

⁷Xub'i'ij k'u ri ángel chwe:

«¿Su'b'e lik kakam awanima' che? Ri'in kanq'alajisaj chawe sa' ke'elawi rixoq y ri nimalaj itzel chikop k'amayom lo re, ri k'o wuqub' ujolom y lajuj ruk'a!. ⁸Ritzel chikop xawilo e ri jun xk'oji' lo ojertan yey ek'u wo'ora na jinta chik. Pero ya kopon ri q'ij kel na lo chupa ri siwan na jinta utaqexik uchoyil upa, y k'isb'al k'u re, ke'ek chi tojb'al mak. Konoje k'u ri winaq ejeqel che ruwachulew, ri na tz'ib'ital ta ri kib'i' chupa ri libro re k'aslemał chwi lo ri jeqeb'al re ruwachulew, kakam kanima'!

* 17:2 Jer. 51:7 a 17:4 “Morato”: Kil “púrpura” pa vocabulario.

che echiri' kakil ri nimalaj itzel chikop re ojertan. Tob' k'u ri' wo'ora na jinta chik, pero kawinaqir tanchi uloq.

⁹»Kajawax na'ojoj cha' jun kumaj usuk' wa': Ri wuqub' ujolom ri nimalaj itzel chikop e ke'elawi wuqub' chi juyub' y puwi taq wa' tz'ul wi rixoq; ¹⁰yey e ke'elawi wuqub' chi taqanelab'. Y wo'ob' chike wa' eb'ik'owinaq chik; jun kataqan wo'ora y ri jun chik k'amaja' kujeq rutaqanik ma k'amaja' kak'unik. Y we xk'unik, lik chirajawaxik wi na naj ta rutaqanik ku'ano. ¹¹Jun chike ri wuqub' taqanel e ri nimalaj itzel chikop, ri jun xk'oji' ojertan y wo'ora na jinta chik, yey kataqan tanchik y ku'ana ruwajxaq taqanel. Yey k'isb'al k'u re, ke'ek chi tojb'al mak.

¹²»Ek'u ri lajuj ruk'a! xawilo, e ke'elawi lajuj chi taqanelab' k'amaja' kakijeq ri kitaqanik; yey kaya' na pakiq'ab' ketaqan junam ruk' ri nimalaj itzel chikop, pero xa jun ora uwach ri kitaqanik. ¹³Wa lajuj taqanelab' junam tzij ki'anom chikiwach puwi ri kitaqanik cha' kakiya na k'u ri kichuq'ab' y ri kitaqanik puq'ab' ri nimalaj itzel chikop. ¹⁴Rike kech'ojin ruk' ri Q'apoj B'exex, pero Rire kuch'ij kichuq'ab', ma e Kajawal konoje ri k'o kiwach y e Taqanel pakiwi konoje ri e taqanelab!. Yey taq ri e k'o ruk' ri Q'apoj B'exex, e ri esik'im y echa'om rumá ri Dios y na kesam ta kib' puq'ab' Rire» xcha'!

¹⁵Je tanchi wa' xub'iij chwe: «Ri ya' xawilo pa tz'ul wi rixoq na chom ta ub'inik, ^b ke'elawi e taq ri tikawex che taq ri tinamit, che ruk'iyal kiwach taq ri tikawex che ruk'iyal uwach ch'a'temal. ¹⁶Ri lajuj ruk'a' ri nimalaj itzel chikop xawilo, wa' tzel kakil rixoq na chom ta rub'inik; kakoq'otaj k'u kan utukel y kakich'anab'a' kanoq, kakitij ruti'jil y tek'uchiri' kakiporoj pa aq!. ¹⁷Ma e ri Dios kakojow pa ri kania' cha' kaki'an ri karaj Rire, wa' e kaki'an tzij chikiwach cha' chupa la' la q'ij ek'owi kakiya ri kitaqanik puq'ab' ri nimalaj itzel chikop k'a che ruq'ijol echiri' ku'ana na ronoje ri ub'iim kan ri Dios. ¹⁸Rixoq xawilo e ke'elawi ri nimalaj tinamit kataqan pakiwi konoje ri taqanelab' che ruwachulew» xcha'!

Rutzaqib'al ri tinamit Babilonia

18 ¹K'isb'al k'u re wa', xinwil chi jun chik ángel xqaj lo chikaj ruk' unimal uchuq'ab'; y ruchomalil ruwonib'al xutzij uwi ruwachulew. ²Lik ko xsik'in che ub'i'xikil:

^b 17:15 Ap. 17:1

«¡E la' xtzaqik! ¡Xtzaq na ri nimalaj tinamit Babilonia! Y wo'ora u'anom kiluwar itzelilaj uxlاب'ixel, kijul ch'ulilaj uxlاب'ixel y kisok ch'ulilaj tz'ikin q'i'tzel ketzu'nik. ³ Ma konoje taq ri jujun chik tinamit che ruwachulew eq'ab'arinaq ruma wa tinamit, ri xeb'umin chupa uk'iyal mak ruk' rayib'al. Konoje k'u ri taqanelab' che ruwachulew emakuninaq ruk'; y konoje taq raj k'ay che ruwachulew eb'eyomarinaq ma ri tinamit Babilonia ruma ri unimal urayib'al lik k'o xuloq' chike» xcha!.

⁴Tek'uchiri' xinta jun chik qulaj xch'aw lo chikaj, jewa' kub'i'ij:

«Chixelub'i chupa ri tinamit Babilonia, ri'ix ix nutinamit, cha' na ki'an ta iwe'ix kuk' rike y jela' na katzaq ta piwi ri'ix ri k'axk'ob'ik kape puwi rire. ⁵Ma na xa ta jub'iq' rumak, e taq wa' xaqi ule'om chi rib' elinaq b'l k'a chikaj. Yey ri na utz taj u'anom, lik k'o chuk'u'x ri Dios. ⁶Chitzelej uk'axel che e chirij taq ri na utz taj u'anom chike ri jujun chik; chikalajij ri k'ax puwi' ruma rumak u'anom; ^c chupa k'u ri copa* pa xuyib'a' wi ri ya' lik k'a chike jujun chik, ri'ix chikalajij ruk'ayul wa' y chiya'a che. ⁷Rire lik xu'an nim che rib' y lik xuya rib' che taq rurayib'al; ek'u wo'ora lik chiya'a pa k'ax y pa oq'ej; ma jewa' ri kub'i'ij pa ranima!: “Ri'in in tz'ulik pacha' in juna reina, yey na in ta malka'n y na kantij tane k'ana oq'ej” kacha!. ⁸Ruma k'u ri', xa pa jun q'ij kape ri k'axk'ob'ik puwi': wa' e kamik, oq'ej y numik; yey ruk' ne aq' kaporoxik, ma ri Dios Qajawxel, ri kuq'at tzij puwi', lik k'o uchuq'ab!» kacha!.

⁹Taq ri taqanelab' che ruwachulew emakuninaq ruk' rixoq, yey junam ruk' rire kiya'om kib' che ruqusil ruwachulew y jek'ula' kitz'ilo'm ri kib'inik ruk!. Ek'u rike keb'oq'ik y ketunan puwi rixoq echiri' kakil rusib'ol rire kak'atik. ¹⁰Lik chinimanaj kek'oji' pan che utzutzu'xik rixoq ruma ruxib'rikil ri k'axk'ob'ik k'o wi y jewa' kakib'i'ij:

«¡Toq'o' awach! ¡Toq'o' awach at nimalaj tinamit Babilonia, ri lik k'o achuq'ab!, ma xa pa joq'otaj xk'un ri q'atb'al tzij pawi!!» kecha!.

¹¹Konoje taq raj k'ay che ruwachulew keb'oq' na y lik kakib'isoj ri nimalaj tinamit ma na jinta chi k'o kaloq'ow re ruk'iyal kik'ay. ¹²Wa' e oro, plata, chomilaj taq ab'aj y

^c 18:6 Jer. 50:29

perlas*; chom taq k'ul lino, chom taq k'ul morato,^d chom taq k'ul xela^e y chom taq k'ul kaq; uk'iyal uwach che' ki' ruxlab'; taq ri 'anatal ruk' marfil, ruk' chom taq che', ruk' bronce, ruk' ch'ich' y ruk' ab'aj mármol; ¹³yey kik'ay re incienso* y kunab'al ki' ruxlab', pacha' canela, mirra* y olíbano; vino, aceite, harina y trigo; kik'ay ke awaj keb'ejanik, ke b'exex, ke kawayu' y re kareta; yey kik'ay ne tikawex e aj chak.

¹⁴Jek'uwa! kakib'i'ij che ri tinamit: «Ronoje taq ri xarayij uwach na jinta chi awuk'; ronoje taq ri b'eyomalil lik xe'ek ak'u'x ruk', xsach uwach y na kariq ta chi k'enoq» kecha!

¹⁵Ek'u ri e aj k'ay re taq wa', ri lik eb'eyomarinaq ruma wa tinamit, lik chinimanaj kek'oji' pan che utzutzu'xik wa tinamit ruma ruxib'rikil ri k'axk'ob'ik petinaq puwi!. Ewi lik kakooq'ej loq, ¹⁶jewa! kakib'i'ij:

«iTaq'o' uwach! iTaq'o' uwach ri nimalaj tinamit, ri pacha' junia ixoq uwiqom rib' ruk' chomilaj uq'u' 'anatal ruk' lino, ruk' k'ul morato y kaq; wiqital ruk' oro, ruk' chomilaj taq ab'aj y perlas! ¹⁷Ma xa pa joq'otaj xsach uwach ruk'iyal ub'eyomalil» kecha!.

Konoje k'u ri e k'amal uwach barcos, ri keb'in pa barcos, ri kechakun pa barcos y taq ri kek'ayin ruk' barcos, chinimanaj kek'oji' wi lo che. ¹⁸Ek'uchiri' kakil rusib'ol wa tinamit kak'atik, lik ko kesik'in che ub'i'xik: «¿K'o nawi junia chik tinamit kajunimax ruk' wa nimalaj tinamit? iNa jintaj!» kecha!.

¹⁹Y ri winaq kakipuk' ulew chwi kijolom ruma kib'is, keb'oq'ik y ko kesik'ini, jewa! kakib'i'ij:

«iTaq'o' uwach! iTaq'o' uwach ri nimalaj tinamit! Ma konoje ri k'o barcos kuk' lik xeb'eyomar ruk' wa tinamit; yey xa k'u pa joq'otaj xsach uwach ronoje. ²⁰Ri'ix ri ix jeqel chila' chikaj, chixki'kota ruma ri xuk'ulumaj wa tinamit. Chixki'kot iwonoje ri'ix ri iya'om iwib' puq'ab' ri Dios, ri ix utaquo'n y ri ix q'alajisanelab', ma Rire e xq'lataw tzij puwi wa nimalaj tinamit ruma ri xu'an chiwe» kecha!.

²¹Tek'uchiri', jun ángel lik k'o uchuq'ab' xuyak jun nimalaj ab'aj, runimal wa' e pacha' junia nimalaj ka!, y xuk'aq b'i chupa ri mar, jewa! kub'i'ij:

^d **18:12** "Morato": Kil "púrpura" pa vocabulario. ^e **18:12** "Xela": Pa kaxtila "seda" rub'i!.

«Jela' ruwulixik b'i ri nimalaj tinamit Babilonia y na kilitaj ta chi uwach.

²² »Awuk' ri'at Babilonia, na katataj ta chi uch'awib'al arpa, uch'awib'al ke aj música, uch'awib'al su' yey uch'awib'al trompeta; na keb'ilitaj ta chi ne aj chak y na katataj ta chi ne uch'awib'al ri ka' kaqilowik. ²³ Na jinta chi ne k'ana aq' kawonik, na katataj ta chi ne k'ana nimaq'ij re k'ulanikil. Ma e taq raj k'ay xek'oji' awuk', e más nim ri kitaqanik che ruwachulew. Ruma taq ri itz xa'ano, xesokotaj konoje taq ri tinamit che ruwachulew. ²⁴ Yey ri winaq re wa tinamit xekikamisaj taq ri q'alajisanelab' re ri Dios y rutinamit ri Dios, y xekikamisaj ne uk'iyal tikawex che taq ronoje ri tinamit re ruwachulew» kacha!.

Ri e k'o chila' chikaj kakiyak uq'ij ri Dios

19 ¹K'isb'al re wa' xinta uk'iyal winaq chila' chikaj jewa' kakib'i'ij:

«iAleluya!

iRi Dios Qajawxel taqal che kayak uq'ij
ruma ri kolob'etajik uya'om chiqe
y ruma runimal uchomalil y ruchuq'ab'!

² Rire paqatzij wi lik usuk'

y lik jusuk' ri q'atb'al tzij ku'ano.

Ma xuq'at tzij puwi ri jun ixoq lik na chom ta rub'inik,
ri xeb'umin ri tikawex re ruwachulew cha' kemakun ruk'.
Ek'u ri Dios xu'an uk'axel che
ruma xeb'ukamisaj ri e aj chak re ri Dios» kecha!.

³ Je tanchi wa' xkib'i'ij:

«iAleluya!

Na jinta utaqexik kab'uqlan chikaj rusib'ol ri aq'
pa xk'aq wub'i rixoq» xecha!.

⁴ Ek'uchiri', ri veinticuatro nimaq winaq kuk' ri kajib' k'o kik'aslemal pacha' e ángeles,^f xkiqasaj kimejelem k'a chu'lew y xkiloq'nimaj uq'ij ri Dios ri tz'ul pa ri tz'ulib'al re taqanik, jewa' kakib'i'ij:

«iAmén*! iAleluya!» kecha!.

⁵ Chupa k'u ri tz'ulib'al xtataj jun qulaj, jewa' kub'i'ij:

«Chiyaka uq'ij ri qa Dios,

^f 19:4 Ap. 4:6-8

iwonoje ri kixchakun chupa ruchak,
 iwonoje ri k'o xi'in ib' iwuk' chwach,
 chinima'q chich'uti'q» kacha'.

⁶Tek'uchiri', xinta pacha' kiqlul uk'iyal winaq jela' pacha'
 ruch'awib'al utza'm ya' echiri' kak'unik y pacha' uch'awib'al
 unimal jab', jewa' kakib'i'ij:

«iAleluya!

Ma e kataqan ri Dios Qajawxel,
 ri k'o ronoje unimal chuq'ab' puq'ab'.

⁷Chojki'kotoq, lik chojki'kotoq y qayaka uq'ij Rire,
 ma xopon ruq'ijol ri k'ulanikil re ri Q'apoj B'exex
 y ri rixoqil lik uwiqom chi rib'.

⁸Ma che rire ya'tal wi kuwiq rib'
 ruk' chomilaj uq'u' 'anatal ruk' k'ul lino
 lik kawolq'linik» kecha'.

Wa' wa k'ul lino e k'utub'al re ri jusuk' kib'inik kisilab'ik
 rutinamit ri Dios.

Ri nimaq'ij re ruk'ulanikil ri Q'apoj B'exex

⁹Ek'u ri ángel jewa' xub'i'ij chwe: «Chatz'ib'aj wa': Lik nim
 kiql'ij kalaxik konoje ri esik'im pa ri wa'im re ruk'ulanikil ri
 Q'apoj B'exex» xcha'.

Yey jewa' tanchi xub'i'ij chwe: «Wa ch'a'tem e re ri Dios y
 lik qatzij» xcha'.

¹⁰Ek'u ri'in xinxukub'a' wib' xe'raqan uq'ab' ri ángel re
 kanloq'nimaj uq'ij. Pero rire jewa' xub'i'ij chwe: «Chata pe', lik
 ma'an la', ma ri'in xa in jun aj chak re ri Dios jela' pacha' ri'at
 y jela' pacha' ri hermanos, ri kitaqem ri Q'ijsaq uq'alajisam
 ri Qanimajawal Jesucristo. Xew chayaka uq'ij ri Dios, ma
 ri Q'ijsaq re ri Qanimajawal Jesucristo e uk'u'xib'al ri saqil
 q'alajisanik» xcha chwe.

Ruk'unib'al ri Qanimajawal Jesucristo

¹¹Tek'uchiri', xinwil ruwa kaj jaqalik y xinwil k'u jun
 kawayu' saq rij. Yey ri kojoyom re jewa' rub'i!: "Jusuk' y
 Usuk", ma chi usuk'likil kuq'at tzij y ku'an ch'a'oj. ¹²Taq
 ruwach lik kewonik pacha' aq' kareprotik y chwi rujolom
 kojom uk'iyal diademas; yey k'o jun b'l'aj tz'ib'ital che y na
 jinta junq kamajaw usuk', xew Rire kumaj usuk!. ¹³Yey ruq'u'
 b'ala'l pa kik' y rub'i' Rire e: "Ri Tzij re ri Dios." ¹⁴Taq ri

ejércitos re chila' chikaj eteran chirij, e k'o lo chwi kawayu' saq kij. Kikojom kiq'u' 'anatal ruk' k'ul lino lik saq y lik chom.
¹⁵Puchi' ri Jun ukojom lo ri kawayu' saq rij, kel lo jun espada lik t'isi's utza'm cha' ruk' wa' ku'an k'ax chike taq ri tinamit. Rire kataqan pakiwi' ruk' jun vara ch'ich' yey ku'an chike pacha' junoq kuyiq'iya' upa ri uva cha' kel ruwa'al. Ruk' k'u wa' kaq'alajin wi runimal royowal ri Dios, ri k'o ronoje unimal chuq'ab' puq'ab'. ¹⁶Che k'u ruq'u' chwi ra' jewa' tz'ib'italik:

«TAQANEL PAKIWI RI TAQANELAB'

Y AJ WACH PAKIWI TAQ RI K'O KIWACH..»

¹⁷Tek'uchiri', xinwil jun ángel tak'al chwach ri q'ij, jewa' ri kasik'in che ub'i'xik chike konoje rawaj kexik'ik' lik chikaj, ri etijol ke ri ekaminaq chik: «Chixpetoq, chimolo iwib' che ri nimalaj wa'im kuya ri Dios ¹⁸cha' kixwa' ruk' ri kitil'jil ri e taqanelab', ri e aj wach ke soldados y taq ri lik k'o kichuq'ab'; ri kitil'jil taq ri kawayu' y ri ekojoyom ke; yey ri kitil'jil ri eloq'otal rumá kajaw y ri na e jinta puq'ab' juna kajaw, ri k'o kiwach y ri na jinta kiwach» kacha!.

¹⁹Xinwil k'u ri jun nimalaj itzel chikop^g yey ri e taqanelab' che ruwachulew kuk' ri ki ejércitos, kimolom kib' re kech'ojin ruk' ri Jun ukojom lo rukawayu' y kuk' ru ejércitos eteran chirij. ²⁰Xchap k'u ri nimalaj itzel chikop, junam ruk' ri jun q'alajisanel sokoso'nel, ri u'anom uk'iyal k'utub'al chwach ri nimalaj itzel chikop yey ruk' wa' eb'usokom lo konoje taq ri kik'ulum ri retaliil ri nimalaj itzel chikop y xkiloq'nimaj uq'ij ri jun uk'axwach. Kikab'ichal k'u ri', e la' chikik'aslikil xek'aq b'i chupa jun luwar kayenen che aq' y kajinow ruk' azufre. ²¹Ek'u ri nik'aj chik xekamisax ruk' ri espada kel lo puchi' ri Jun ukojom lo ri kawayu' saq rij; yey e taq k'u rawaj kexik'ik' lik chikaj, ri etijol ke ri ekaminaq chik, lik xewa' chi utz ruk' ri kitil'jil.

Ri mil junab'

20 ¹Tek'uchiri', xinwilo echiri' jun ángel xqaj lo chila' chikaj, yey wa' ruk'a'am lo ri lawe re ri siwan na jinta utaqexik uchoyil upa y ruk'a'am lo jun nimalaj karena puq'ab'. ²Wa jun ángel xuch'ij uchuq'ab' ri dragón*, wa' e ri kumatz re ojertan,^h ritzel winaq Satanás* rub'i!. Xuyut k'u ri' cha' kaya'i!

^g 19:19 Wa' e kach'a'tib'ex Ap. 13:1-18. ^h 20:2 Gn. 3:1

pa karena mil junab', ³ xuk'aq b'i chupa wa siwan, xutz'apij uchi' y xukoj k'u rusello chwi ri tz'apib'al cha' ritzel winaq na keb'usok ta chi taq ri tinamit k'a echiri' kuk'is na ri mil junab' ximitalik. K'isb'al k'u re wa', kayolopix chi jujun q'ij.

Ri nab'e k'astajib'al

⁴Tek'uchiri', xinwil uk'iyal tz'ulib'al re taqanik yey wa etz'ul chupa ya'tal pakiq'ab' ketaqanik. Y xeb'enuwil konoje ri tikawex xk'atzix kijolom rumá xkitzijoj ri Utzilaj Tzij re ri Qanimajawal Jesucristo y Rutzij ri Dios; wa' e taq ri na xkixukub'a' ta kib' chwach ri nimalaj itzel chikop y chwach ri jun uk'axwach y na xkik'ul ta ri retalil ri nimalaj itzel chikop che rukurusil ri kipalaj o che ri kiq'ab!. Rike xek'astajik y junam ruk' ri Cristo* xetaqan mil junab!. ⁵E nab'e k'astajib'al wa!. Noj' ri nik'aj chik ekaminaq k'ate kek'astajik echiri' ik'owinaq chi ri mil junab!. ⁶Lik nim kiq'ij kalaxik ri kek'astaj lo che wa nab'e k'astajib'al, ma rike e utinamit ri Dios. Ek'u ruka'm kamik na jinta chi uchuq'ab' pakiwi', yey keb'u'ana k'u e aj chakunel chwach ri Dios y chwach ri Cristo y junam ruk' Rire ketaqan mil junab'.

Ritzel winaq kayolopixik

⁷Echiri' ik'owinaq chi ri mil junab', ri Satanás kayolopix lo pa ri luwar pa tz'apil wi. ⁸Y kel b'i che kisokoso'xik taq ri tinamit e k'o che ronoje ruwachulew, jenela' ku'an chike ri Gog y ri Magog,ⁱ cha' kumol kichi' re pa ch'a'oj. Ri kajlib'al taq wa' e pacha' ruk'iyal ri sanyeb' k'o chuchi' ri mar. ⁹Y xepe k'u che ronoje ruwachulew y xkisut rij ri tinamit lik k'ax kuna' ri Dios, wa' e luwar pa kimolom wi kib' ri lik kiya'om kib' puq'ab' Rire. Pero ri Dios xutaq lo aq' chikaj pakiwi ri eyaktajinaq chirij rutinamit, y xeb'uporoj k'u konoje.

Kaq'at tzij puwi ritzel winaq

¹⁰Ek'u ritzel winaq, ri xeb'usok taq ri tinamit, xk'aq b'i chupa ri jun luwar kayenen che aq' y kajinow ruk' azufre, chiril' pa e k'o wi ri nimalaj itzel chikop y ri jun q'alajisanel sokoso'nel; y chipaq'ij chichaq'ab' kek'oji' pa k'ax na jinta chi utaqexik.

¹¹Tek'uchiri', xinwil jun nimalaj tz'ulib'al lik saq y xinwil ri Jun tz'ul chupa. Yey ek'u la' chwach Rire, e ruwachulew y

ⁱ 20:8 Ez. 38:1—39:6

ruwa kaj xemalka'nik y na xilitaj ta chi kiwach. ¹²Y xinwil kiwach ri ekaminaq chinima'q chich'uti'l q e tak'al chwach ri Dios. Tek'uchiri' xjaqataj upa taq ri libros yey xjaqataj upa jun chik libro, wa' e ri libro re k'aslemal. Chupa taq wa libros tz'ib'ital wi taq ri ki'anom ri ekaminaq, y ek'u chirij taq wa' xq'at tzij pakiwi!. ¹³Ri mar xeb'utzelej lo ri ekaminaq e k'o chupa; ri rajaw ri kamik y ri rajaw ri Hades^j xekitzelej lo ri ekaminaq e k'o kuk'; y xq'at k'u tzij pakiwi' chikijunal e chirij taq ri ki'anom. ¹⁴Ek'u ri rajaw ri kamik y ri rajaw ri Hades xek'aq b'i chupa ri jun luwar kayenen che aq'. Wa' e ri uka'm kamik. ¹⁵Chupa k'u wa' wa jun luwar xek'aq b'i ri na tz'ib'ital ta kib'il chupa ri libro re k'aslemal.

Ri k'ak' uwa kaj y ri k'ak' uwachulew

21 ¹Tek'uchiri' xinwil jun k'ak' uwa kaj y jun k'ak'
uwachulew, ma ri nab'e uwa kaj y ri nab'e uwachulew xemalka'nik, yey ri mar na jinta chik. ²Ri'in in Juan xinwil ri santowilaj tinamit, ri k'ak' Jerusalem, e ri' xqaj lo chila' chikaj petinaq ruk' ri Dios, yey lik wiqital chi utz pacha' juna ali lik uwiqom rib' echiri' ku'lk'ulu rala kak'uli' ruk!. ³Y xinta k'u jun qulaj xel lo pa ri tz'ulib'al re taqanik, lik ko xch'awik, jewa' kub'ilⁱj:

«iChatape! Ri Dios kak'oji' chikixo'lib'al ri tikawex y kajeqi' kuk'; ma rike e utinamit, y Rire e Dios ke rike. ⁴Ek'u ri Dios kusu' ruwa'al kiwach konoje rike. Chwi k'u wo'ora na jinta chi kamik, na jinta chi oq'ej, na jinta chi kejuyuyik y na jinta chi k'axk'ob'ik; ma ronoje taq ri k'o lo ojertan, ya xik'owik» kacha!.

⁵Ek'uchiri', ri Jun tz'ul pa ri tz'ulib'al re taqanik, jewa' xub'ilⁱj:

«Chatape!: Ri'in kan'an k'ak' che ronoje taq ri k'olik» xcha!

Yey xub'ilⁱj chwe:

«Chatz'ib'aj taq wa', ma wa ch'a'tem lik are' y lik qatzij» xcha!.

⁶Je tanchi wa' xub'ilⁱj chwe:

«Ek'u wa' xutzir ronoje. Ri'in in ri jeqeb'al re yey in ri k'isb'al re, jela' pacha' ri ka'ib' letra A y Z.^k Chike k'u konoje ri katzajin kichi', kansipaj ri ya' kalax lo che ri ak'al re k'aslemal.

^j 20:13 Ap. 6:8 ^k 21:6 “A y Z”: Kil “Alfa y Omega” pa vocabulario.

⁷China k'u ri kach'ijow uchuq'ab' taq ri na utz taj, kuk'ul ronoje taq wa', yey in k'u u Dios ri', y rire ku'ana walk'o'al.
⁸No'j ri e turun,^l y taq ri xkijolij ri kub'ulib'al kik'u'x wuk', ri kaki'an ri lik k'ixb'al uwach y ri e kamisanel, ri kaketz'ab'ej uwa kiq'ij kuk' jujun chik na kik'ulel taj y ri e aj itz, ri e aj tioxab' y konoje ri kaki'an raq'ub'al, konoje k'u rike keya' pa ri jun luwar kayenen che aq' y kajinow ruk' azufre. Ek'u uka'm kamik wa!» xcha!.

Ri k'ak' Jerusalem

⁹Tek'uchiri', xqib' lo wuk' jun chike ri wuqub' ángeles, ri xya'taj ri wuqub' copas* chike, ri nojinaq che ri wuqub' k'isb'al k'axk'ob'ik.^m Xch'a't k'u wuk', jewa' xub'i'ij: «Sa'a na wara, ma kank'ut rali chawe ri kak'uli' ruk' ri Q'apoj B'exex» xcha!. ¹⁰Ek'u la' chupa ri xk'ut chinuwach ruma ri Ruxlab'ixel ri Dios, ri ángel xinuk'am b'i chwi jun nimalaj juyub' lik naj uwi' y xuk'ut chwe ri nimalaj santowilaj tinamit Jerusalem, e ri' katajin lo uqajik chila' chikaj petinaq ruk' ri Dios. ¹¹Wa'lik kawon che runimal uchomalil ri Dios; ruwonib'al e pacha' juna chomilaj ab'aj pacha' ri jaspe, lik kajuljut upa pacha' chi vidrio. ¹²Sututal k'u rij ruk' jun nimalaj tapia lik naj uwi'; k'o kab'lajuj okib'al che y chujujunal okib'al k'o jun ángel aj chajal re, yey che taq ri okib'al tz'ib'ital jun b'i'aj ke ri kab'lajuj tinamit re Israel. ¹³Yey e taq ri okib'al che ri tapia oxib' k'o pa releb'al q'ij, oxib' k'o pa norte, oxib' k'o pa sur y oxib' k'o putzaqib'al q'ij. ¹⁴Ri nimalaj tapia re ri tinamit tz'aqom lo kab'lajuj nimaq taq ab'aj pa raqanib'al; yey chujujunal ri nimaq ab'aj, tz'ib'ital rub'i' jun chike ri kab'lajuj taqo'n re ri Q'apoj B'exex.

¹⁵Ri ángel kach'a't wuk' ruk'a'am jun vara re pajab'al 'anom ruk' oro cha' kupaj ri tinamit, taq ri okib'al y ri tapia. ¹⁶Ri tinamit cuadrado u'anom; ri raqan junam ruk' ruwach. Ek'u ri ángel xupaj ri tinamit ruk' ri vara k'o puq'ab'. Y xe'eloq ka'ib' mil ruk' ka'ib' ciento kilómetros runajtijil ri raqan, jela' runajtijil uwi', y jela' runimal uwach. ¹⁷Tek'uchiri', xupaj runajtijil ri raqan ri tapia; sesenta y cinco metrosⁿ k'o che. Ri

^l 21:8 “Turun”: Wa' e ri kakixi'ij kib' y kek'ix che utzijoxik Ruch'a'lem ri Dios. ^m 21:9 Ap. 15:1; 16 ⁿ 21:16-17 Pa versículo 16 ri ch'a'lem griego kub'i'ij “doce mil estadios” (wa' ke'eloq 12 x 1,000 = 12,000). Yey pa ri versículo 17 kub'i'ij “ciento cuarenta y cuatro codos” (wa' ke'eloq 12 x 12 = 144). Ojertan “12” ke'elawi “tz'aqat uwach”.

pajab'al xuchapab'ej wa ángel e junam ruk' ri kakichapab'ej ri tikawex.

¹⁸ Ri tapia e 'anom ruk' ab'aj jaspe; no'j ri tinamit e 'anom ruk' saqil oro, kawon upa jela' pacha' chi vidrio. ¹⁹ Taq ri pa raqanib'al ri tapia re ri tinamit wiqital ruk' ronoje chomilaj taq ab'aj. Ri nab'e, ruk' ab'aj jaspe; ruka'm, ruk' zafiro; rurox, ruk' ágata; rukaj, ruk' esmeralda; ²⁰ ruro', ruk' ónica; ruwaqaq, ruk' cornalina; ruwuq, ruk' crisólito; ruwajxaq, ruk' berilo; rub'elej, ruk' topacio; rulajuj, ruk' crisopraso; ri junlajuj, ruk' jacinto y rukab'lajuj, ruk' amatista. ²¹ Taq ri kab'lajuj okib'al e kab'lajuj perlas*; chujujunal okib'al e jun nimalaj perla. Y ri nimab'e k'o chunik'ajal ri tinamit 'anom ruk' saqil oro, lik kajuljut upa pacha' chi vidrio.

²² Yey chupa k'u wa tinamit na xinwil ta juna templo pa kaloq'nimax wi ri Dios; wa' na kajawax ta chik, ma chila' pa ronoje luwar k'o ri Dios Qajawxel, ri k'o ronoje unimal chuq'ab' puq'ab', y k'o ri Q'apoj B'exex. ²³ Che wa tinamit na kajawax tane uwonib'al ri q'ij y ri ik', ma runimal uchomalil ri Dios kutzij upa yey ri Q'apoj B'exex e uwonib'al ri!. ²⁴ Ek'u ri jujun chik tinamit keb'in chwa ri q'ijsaq re wa jun tinamit; yey ri e taqanelab' che ruwachulew kakik'am lo chupa wa tinamit ri chomilaj kib'eyomalil re yakb'al uq'ij ri Dios.^o ²⁵ Taq ri okib'al re wa tinamit na katz'api' ta chi k'enoq, ma chiril' na jinta chi aq'ab!. ²⁶ Ri chomilaj b'eyomalil ke taq ri tinamit e kak'am lo che wa tinamit re yakb'al uq'ij. ²⁷ Chupa k'u wa' wa tinamit na jinta k'ana ch'ul kok loq, na kok ta uloq ri ku'an ri lik k'ixb'al uwach y ri ku'an raq'ub'al; ma xew keb'ok lo ri tz'ib'ital kib'l'i chupa ri libro re k'aslemal re ri Q'apoj B'exex.

Ri ya' re k'aslemal

22 ¹Tek'uchiril', ri ángel xuk'ut chinuwach jun nimaya' ruk' ya' re k'aslemal, wa' lik kajuljut upa jela' pacha' chi vidrio, yey kel lo pa k'o wi ri tz'ulib'al re taqanik re ri Dios y re ri Q'apoj B'exex. ²Punik'ajal ri nimab'e re ri tinamit y che ukab'ichal uchi' ri nimaya', k'o ri che' kuya k'aslemal.^p Wa che' kuya kab'lajuj uwach chupa ri junab', yey chujujunal

^o 21:24 Is. 60:3,5 ^p 22:2 K'o ri kakich'ob' raqan ri nimaya' kik'ow chunik'ajal ri nimab'e y ri che' k'o chunik'ajal ri nimaya', yey ri ratz'ayaq y ruq'ab' kumaj ukab'ichal uchi' ri nimaya'. Gn. 2:9; Ez. 47:7-12; Ap. 2:7

ik' kawachinik. Ek'u ruxaq e re kunab'al ke taq ri tinamit che ruwachulew. ³Chiri' na jinta chi ri na utz ta uwach xuk'am lo ri mak. ⁴Ek'u ri tz'ulib'al re ri Dios y re ri Q'apoj B'exex kak'oji' chiri' yey konoje ri e nimanel re ri Dios kakiloq'nimaj uq'ij Rire. ⁴Kakil k'u uwach ri Dios pa saqil wi y rub'i' Rire kak'oji' che rukurusil ri kipalaj. ⁵Chiri' k'u ri' na jinta chi aq'ab'; ri kejeqi' chiri' na kajawax ta chi ne uwonib'al aq' re lámpara chike y na kajawax tane utzu'rib'al ri q'ij, ma ri Dios Qajawxel e q'ijsaq chike. Yey ri kitaqanik rike na jinta chi utaqexik.

Ruk'unib'al ri Cristo*

⁶Jewa' xub'il'ij k'u ri ángel chwe:

«E taq wa' wa ch'a'tem lik are' y lik qatzij. Y ri Dios Qajawxel, ri kaya'w kich'a'tem ri ketzijon re Rutzij, utaqom lo ru ángel cha' kuq'alajisaj chike ri e aj chak re Rire janipa taq ri katajin loq» xcha'.

⁷Ek'u ri Qanimajawal jewa' kub'il'ij:

«¡Chitape!! iNa naj ta chi ri woponik iwuk!! Lik nim uq'ij ralaxik ri kutaquej taq wa q'alajisanik tz'ib'ital chupa wa libro» kacha'.

⁸Ri'in in Juan, in ri xintaw re yey in ri xinilow re ronoje taq wa!. Echiri' nutom y wilom chi taq ronoje wa!, xuaj kanloq'nimaj uq'ij ri ángel, ri xb'i'n re y xk'utuw re chwe ronoje taq wa'; xinxukub'a! k'u wib' xe'raqan uq'ab', ⁹pero rire jewa' xub'il'ij chwe:

«Lik ma'an la', maxukub'a! awib' chinuwach. Ma ri'in xa in jun aj chak re ri Dios jela' pacha' ri'at y taq rawach e q'alajisanelab', junam kuk' ri kakikoj utzij taq wa tz'ib'ital kan chupa wa libro. E chaloq'nimaj uq'ij ri Dios» xcha'.

¹⁰Je tanchi wa' xub'il'ij ri ángel chwe:

«Mawewaj taq ri q'alajisanik tz'ib'ital chupa wa libro, ma xa naqaj chi k'o wi lo ruq'ijol cha' ku'ana taq wa!. ¹¹China k'u ri ku'an ri na jusuk' taj, we na karaj taj karoq'otaj u'anik, ruk' k'u rire k'o wi. China ri uch'ulam rub'inik, we na karaj taj karoq'otaj wa!, ruk' k'u rire k'o wi. Yey ek'u ri ku'an ri lik jusuk', e chutaquej u'anik ri lik jusuk' y china ri uya'om rib' che jun santowilaj b'inik, e chuchuq'ub'ej rib' che wa!» xcha ri ángel.

¹²Ek'u ri Qanimajawal jewa' kub'il'ij:

^a 22:3 Gn. 3:17-19

«¡Chitape!! Na naj ta chi ri woponib'al iwuk' y kank'am k'u b'i ri rajil uk'axel, ri kanya chike ri tikawex chikijunal e chirij taq ri ki'anom. ¹³Ri'in in ri jeqeb'al re yey in ri k'isb'al re jela' pacha' ri ka'ib' letra A y Z.^r ¹⁴Lik nim kiq'ij kalaxik ri kaki'an jusuk' che ri kib'nik kisilab'ik,^s ma jela' lik taqal chike kakitij ke ruwach ri che' re k'aslemal y keb'ok b'i che taq ri okib'al re wa tinamit. ¹⁵No'j e taq ri winaq q'ilzel kib'nik kisilab'ik: ri e aj itz, ri kaketz'ab'ej uwa kiq'ij kuk' jujun chik na kik'ulel taj, ri e kamisanel, ri e aj tioxab' kuk' konoje ri lik ke'ek kik'u'x che u'anik raq'ub'al, ri' na kanya ta chike keb'ok b'i chupa wa tinamit. ¹⁶Ri'in in Jesús nutaqom b'i ri nu ángel cha' kutzijo ronoje taq wa' pa taq riglesias. Ri David kuk' taq kan ri ralk'o'al e pacha' jun che'; ek'u Ri'in in ri in ratz'ayaq y in ri utux wa' wa che'^t yey in pacha' ri jun ch'umil kawon pa saqrib'al»^u kacha ri Jesús.

¹⁷Ri Ruxlab'ixel ri Dios y ri rixoqil ri Q'apoj B'exex, jewa' kakib'i'ij:

«Peta la» kecha!.

Y china ri kataw re, chub'i'ij:

«Peta la.»

China k'u ri katzajin uchi' y karaj kapetik, petoq y chutija re ri ya' re k'aslemal, yey wa' xa kasipax che.

¹⁸Ri'in in Juan kanq'alajisaj k'u wa' chikiwach konoje ri ketaw re ri q'alajisanik re wa libro: We k'o junq kukoj uw'i ronoje taq wa', ri Dios kutaq lo puwi' janipa ri k'axk'ob'ik tz'ib'ital chupa wa libro. ¹⁹We k'o k'u junq k'o karesaj che ri q'alajisanik re wa libro, ri Dios na kuya ta chi che kutij ruwach ri che' ri kuya k'aslemal, na kuya tane che kok b'i chupa ri santowilaj tinamit re ri Dios, yey na jinta chi k'ana re che janipa ri utz tz'ib'ital kan chupa wa libro.

²⁰Ek'u ri kajikib'an uwach taq wa', jewa' kub'i'ij:

«Paqatzij wi na naj ta chi ri woponib'al iwuk'» kacha ri Jesús.

¡Amén!* E chu'ana ri', peta la, Qanimajawal Jesucristo.

²¹K'ulu k'u onoje alaq ri' ri unimal rutzil uk'u'x ri Dios.

Amén.

^r 22:13 “A y Z”: Kil “Alfa y Omega” pa vocabulario. ^s 22:14 Pa ri ch'a'tem griego kub'i'ij “ri kakich'aj ri kiq'u!”. ^t 22:16 Ri Jesús e ri “ratz'ayaq” ri David ma xex chi k'o lo wi chwach ri David yey e Rire ri xya'w ri na'ojo y ri taqanik che. Ri Jesús e “rutux ri che' kel lo che ri David” ma e ralk'o'al kan ri rey David. Is. 11:1,10; Ro. 1:3 ^u 22:16 Nm. 24:17; Ap. 2:28